

臨河縣志

署 涿鹿呂咸



墾務沿革紀略

中國以農立國禹平洪水后稷教稼此爲中國墾植創始時代上古注重民生任民種植不加限制迨至周禮地官專設土均土會墾地之法遂漸求詳至強秦北逐匈奴拓陰山北之餘地使貧民墾闢名其地曰北假此爲河套墾務開始時代厥後田官罷除邊疆多事千里河套旋興旋廢移民開邊之大計迄未實行甚至終明之世河套迄不能內屬嗚呼禹甸滿目荒榛良足太息有清末造庚子遘變岑春煊督師入衛道經河套慨然興移民屯墾之思光緒三十年奏派貽穀爲西盟墾務督辦貽督辦統籌全局規定西盟墾務應先由河套入手於是勸導蒙族次第報墾規模遂大定焉作墾務沿革紀略

達拉特旂墾務項下

按達拉特旂地凡二種曰放墾地曰永租地而放墾地又分二種曰四成地曰四成補地此二種地界不隸臨河故略而不詳考其永租地均隸八道官渠隸於臨河境者有永濟渠永租地計地八百頃有剛濟渠永租地計地二百五十頃案譯永租者不放之

謂也其地由墾局包租於蒙旗由墾局開渠招租所得租銀公家與蒙旗按成收之其
意曰地仍蒙地公家所得者不過渠費與經理之費而已原奏案所云渠到何處地即
開至何處蒙旗雖有地無水澆灌卽等石田有渠卽有地無渠卽無地渠之所至地不
愛寶以明地力之不足恃人力之大可憑也當時與達旂訂定上上地每年每頃收租
銀四十兩上次三十兩中二十五兩下二十兩所收租銀除二成爲渠工其餘作十成
計算公家得三蒙旗得七嗣因租地無定額當事者任意出入不免上下其手民國元
年始定爲包租之制官渠八道永租地以兩千頃爲準每頃收租銀十五兩每頃年收
水利經費銀四兩五錢以一兩三錢歸包戶作修渠費以三兩二錢歸公家作水租此
由公家不能兼顧分包各地商經理時期迨分包地商虧負日重民國九年一師旅長
楊以來組織灌田水利社投貲集股將官渠渠道完全認包乃經理五年虧租至十餘
萬之鉅經王紳同春張紳厚田楊紳文林組織匯源水利公司認包永濟剛濟豐濟沙
河義和渠五道其通濟長濟塔布三渠仍由灌田社以興農社名義包租行之數年仍

無起色此爲地商總包時期十四年國民軍第八旅石旅長友三兼充包西水利總辦
盡收各官渠由官經理當因比年糧價昂貴地之收入日見增漲永租地租照舊額征
收水利經費加至每頃收銀八兩後改爲收洋十元此爲各官渠收回官辦時期究竟
商辦則爭欲自利利不歸公官辦則工大費鉅入不敷出二者俱失當局思欲改良而
亟求進步十七年春墾務局孟總辦斌儀徧召各地方紳董齊集總局大開水利會議
各提議案反復討論旁探周諮不厭求詳議定每渠各立水利社并附水利董事會以
監督進行水利社長及董事會董事長由全渠大戶公推品行端方熟悉水利者充之
永租地仿墾地官租例丈青收租租價每頃三十元半歸蒙半歸公水租每頃收水租
洋十元以七成作渠費一元五角歸公以一元五角歸水利社作常年薪工辦公費設
有臨時要工由該社估算經費呈准由該渠地戶徵歛修理十八年夏設包西水利管
理局以領之是年三月當道召集各社社長董事長在包頭開會因水利局暨各社經
費不足議定每地一頃加征水利經費兩元合之原征十元以七元作渠費以二元五

角歸公以二元五角作租水社經費案經全體通過此爲官渠地官督民辦時期民國十四年達拉特旂報墾西昭地五千頃地全隸臨河二區經達旂地畝局蕭局長收界南至大河岸北至五加河南三道濠東至豐濟渠西至杭錦旂地當時撥交實業廳地一千二百頃撥領山東墾民地七百五十頃其餘丈放民戶千餘頃所餘餘荒無幾與原報數不符祇以常時倉猝丈放既未畫方又不編號不實不盡浮冒弊混在所不免十六年呂王兩局長迭次呈請覆丈又經王局長擬具辦法屢蒙采納將來見諸實行定收成效該地分三則上地每頃荒價洋一百元中地八十元下地六十元每地價百元加建築費洋十元教育費洋五元實業費洋五元十八年二月又奉令每地價百元加征軍事建築費二十元又黃土拉垓河渠達旂地係光緒庚子賠款地當日達旂應出賠教款銀十四萬兩三十年綏遠當道派員會同蒙員及教士三面交涉以黃土拉河達旂地一千四百頃抵作賠款歸教堂管業該地實數一千零八十頃有餘所謂一千四百頃者殆概數耳當時教士所定條件異常苛虐當道委曲求全勉強簽認自該

地歸該教堂因利乘便藉該地左右我民衆其勢力遂日益澎漲官廳無如之何近年革命功成達旗地畝局呂局長咸奉令收回該地爰組立收回黃土拉河教堂地會議以書面正式召集該教士鄧德超該教士延不到會約屢爽呂局長奉令以無條件收回遂卽派員分別勘收該渠地招民領墾分地爲三等荒價附加均如達局例惟地價百元加收教育費五厘達局於十八年四月十日奉令裁併第五分局嗣又移交第六分局此達拉特旗隸屬臨河境內墾務沿革之大略也

一 杭錦旗墾務項下

按杭錦旗放墾伊始按蒙墾奏議略云該旗東巴噶中巴噶地東界達拉特旗界南至黃河西至商人王善舊渠北至達拉旗南界呈報認墾當卽派員驗收東西長二百三十四里南北寬八九十里至十數里不等邊寬中窄形若蜂腰與原報地段相符云云又將兩巴噶西界可墾之地約數千頃呈報併入前次所報界內亦經派員驗收云查該地分五等丈放上地每頃荒價銀一百兩上次九十五兩中地九十兩中次八十五

兩下八十兩旱地凡五等上地每頃荒價銀五十兩上次四十兩中地三十兩中次二十兩下次十兩又查該旗兩次報地七千頃編作元亨利貞四號至十四年由五原劃歸臨河征租者爲元字號一段計地一千五百餘頃地均隸臨河一區丈青征租每頃每年征洋三元七角有奇附辦公費一成縣留七厘辦公解廳三厘又民國十四年杭旂報墾西巴噶地三千餘頃局設臨河三區陝壩鎮地分三等上地荒價一百二十元中地一百元下地八十元每地價百元附加建築費十元教育實業費洋各五元十五年國民軍退却駐臨徵集民糧無算經馮上將軍令所有徵集民糧糧價准由民欠杭局荒價內抵除令甫下因地方大亂局員奔散未及將糧價收賬計應抵地價四萬一千餘元經地方紳董據案哀籲案至今延懸未結杭局於十八年四月奉令裁併第五分局嗣又移交第六分局此杭旂地隸屬臨河內境內沿革之大略也

一烏拉特旂墾務項下

按民國十八年設立綏遠墾務第六分局駐臨河境陝壩鎮該局勘收烏拉特狼山灣

圖密淖西中兩公旂報墾地界址坐落在縣境東至千林廟西牌界爲界西至阿拉善王王爺地卽甘肅邊界爲界南至達拉特旂并杭錦兩旂報墾各地爲界北至狼山山麓以下爲界該地東屬狼山西屬圖密淖依山傍水地勢平衍惟測勘形勢自東北斜西南一百三十餘里應分兩段勘收查圖密淖地東西長約十餘里合面積約三千頃有奇而狼山灣地東西長約一百二十餘里南北寬約二三里至一半里不等平均寬以一里半計算合面積約九百七十餘頃共合面積三千九百餘頃內除沙石城灘溝渠道路不堪耕種及不能上水者約佔面積三分之一并劃留戶口召廟地不計外約可放地一千三百餘頃按照清混水渠水各地丈放計可收洋一十二萬有奇勘收該處界內不論生熟荒地但以辨別土質能上水與不能上水及收穫之多寡擬定等則酌定地價分五等上等清水地每頃荒價洋二百元下等混水地每頃荒價洋一百六十元上等渠地每頃荒價洋一百二十元中等渠地每頃荒價洋一百元下等渠地每頃荒價洋八十元每收荒價一百元附加一成五建設費五分實業費五分社會文化

事業基金費以資挹注該地現已丈放過半約於十八年度內即可放竣將來收竣時
所有地數欸數約可超出原定預算此臨河丈放中西兩公旂報墾地之大概情形也

地方保衛紀略

自來國家保衛地方百計籌劃而不足地方各謀自衛羣力合作而有餘周官比閭卒伍管子軌里連鄉皆地方自衛之良法有清咸同末季曾湘鄉創辦鄉團其力足以芟除梟雄夷平大難其後風行海內終有清之世團練政策日益求詳臨河設治未久團政粗具規模然保境安民試之輒效所謂有治法必有治人其信然歟特作地方保衛紀略

按古臨河縣舊隸漢朔方郡自古籌邊之法莫詳於漢所謂實邊之政屯田之法慎封守嚴斥堠爲邊邑立百年之計不苟一時之安者其法必至詳且備惜我國史例於固邊設防之要略略而不書况時易勢殊代有變遷甚至終明之世地不內屬地方保衛之法無從徵考清乾隆八年河套歸薩拉齊廳治其時河套僻處西徧氈裘毳幕彌望黃沙勢難遙制光緒二十九年劃河套之地隸屬五原廳廳署寄居包頭鞭長莫及厥後三十年在後套隆興長北五里白圪梁地方建修五原公署始設警察兩棚駐廳署此外仿鄉團之法設民警八十名分駐四區按民警官長曰民警佐官兵薪餉由地方

徵集此爲後套地方創立保衛團之始惟地闊兵單分布不敷今之臨河卽前之五原西界民警之馬跡旂影有終年不得一見者時爲之地限之也至民國改廳爲縣四年五月五原王知事文墀以縣署在包遙制不便移治後套縣署以從民意六月以民警佐強萬義帶民警二十名駐強家油房卽今之臨河縣城地此爲臨河設立保衛之始六年奉令民警改編保衛團照章以三十人爲一隊每區駐一隊總團董以王紳同春充之其編制之法仿徵兵制團丁均由大戶保送限制綦嚴無如陽奉陰違人則濫竽充數游兵無賴兼收并蓄魚肉鄉民苛案勒擾之事往往不免保民善政轉而厲民縱之難圖激之生變已成尾大難掉之勢十年薩五包東警兵爲外奸勾結響應譁變五原西區保衛團李隊長虎東爲其所部范天保等槍斃尋以劉三洪代其職劉三洪爲綏西積匪在五原南區受撫地方人特加優容匯源水利公司劃剛濟渠地三四十頃歸劉三洪耕種聽其開渠澆水不責其值故不數年而財雄一鄉地方人之策勵而獎勸之者亦云至矣惜彼昏不悟憑藉保衛團勢力所至之處人人側目十四年臨河設

治蕭局長立置劉三洪於法經所謂自作孽不可逭者歟蕭局長依法改編武裝警察隊七十名分爲三大隊以姚聯榜爲總隊長編置伊始壁壘一新十五年二月第一隊兵士內訌相率譁變倒弋橫擊槍斃劉隊長立即紛竄四鄉旋即就撫若輩旋撫旋叛習爲固然當局不能痛加懲創澈底改革養癰貽患各縣覆轍相尋禍機潛伏一觸卽發惜哉是年四月于局長景文來臨收拾殘局拾遺補闕復爲三隊規制如舊七月間國民軍全部來套分駐五臨部衆數萬悉索敝賦日不暇給正式武裝隊遂爲傳達軍書催送糧秣之差夫秋冬之交土匪蠡起姚局長聯榜親率該隊會同五原武裝隊及杭旂游擊隊合力剿匪歷時兩旬奔馳三百里卒能力挫強虜匪燄稍靖十六年一月國民軍全部西退是時地方大亂武裝隊之槍械搜括殆盡三月匪首石海率匪衆百餘突佔縣城勒索槍械孫局長國棟盡出警隊殘餘武裝予之臨河武裝隊至此人皆徒手空擁虛名焉六月呂局長咸來宰是邑深念夫武裝徒手不足自衛令各區董大戶設法籌備又收楊正業之槍十枝以增益之於是武裝隊稍復舊觀改編爲兩隊計

額三十名以柴高魁總領之以武榮楊正業分領之十二月王局長文墀接設治局任
武裝隊悉仍舊制十七年春奉令改編保安隊額設隊兵三十名分三班以楊紳春林
充大隊長以柴高魁武榮王化南分領之是年夏復改爲保衛團範圍縮減團丁減爲
二十名以劉紳長義爲團董自是當道注重團務規制日臻嚴密實行徵兵制凡團丁
均由大戶選送薪餉一概裁撤其少數團費及馬乾由地方撙節籌集民間不出養團
之款費人人均有充兵之義務民間見其簡而易從也又痛念夫比年變亂仰賴軍隊
保衛不如各謀自衛之甚便也於是不募而集不招而至貧戶出丁富戶輸械履畝抽
糧按時徵款人人有自衛之精神人人結自衛之團體計自十七年秋冬以來雖迭經
趙匪往返竄擾而數萬飢民竟無一從賊者又計自十八年秋冬以後以迄十九年春
季全境內並未發生劫案而十百成羣橫行鄉里者更寂然無聞此可知保衛團之確
能自衛其成效大驗概可見已近日奉頒保衛團法規法制嚴明程序周密依法編組
頓復舊觀各縣長爲全縣總團長各區長爲區團長鄉鎮長爲甲長又有甲牌互保之

法務期澈底刷新無復游民潰兵溷跡其間其槍械必重行檢查以清界限本縣彭縣長將縣團取消另編馬兵三十名歸公安局兼轄地方收省費之實效除革冗員之虛糜厥功偉已夫地方養兵爲地方用也乃各縣地方保衛機關平日優游無事坐領薪餉恒舞酣歌習爲固然一旦地方猝遇軍事而此正式鄉兵祇足供徵糧催草傳送軍書之用往往遣發一空欲求其守衛官舍保護庫藏而不可得更何望其荷戈前驅禦侮勦匪哉此真可爲長太息者矣噫地方日出養兵之費而不收養兵之用此又何怪地方人視之如贅瘤而斂手側足不樂供億也幸而天時人事紛集交乘外迫於萑苻之紛生知我民不能不亟圖自立內迫於征索之日困知我民不能不合謀自強或則幡然改圖毀家紓難或則憬然知悟破產充公採購槍械招募武勇俾期家自爲防人自爲戰散則爲商爲農聚則爲兵遠則內地各縣近則薩武固陽各縣往往一縣保衛團累萬盈千團幟高揭而潢池小醜輒望遠引而莫敢犯不可謂非我民衆窮極思返轉弱爲強一大機括也我臨河東障包綏西通甘寧北控蒙疆南襟秦晉省防國防

鑄鍵在是倘能依照保衛團法切實推行或則堅壁清野烽埃無驚或則憑山帶河鞭弭從事將奇正可以互用攻守可以自如詩曰與子同袍與子同仇此豈獨一身一家之利國家邊計亦實利賴之矣機不可失時不可待吾願地方人亟起而直追之勿令作者徒以空文自見也幸甚

賦稅紀略 地方捐款附

禹貢三壤成賦周官九賦徵財國家取於民也有經制國民奉於公也有常供此古今之通義亦中外之通例也臨河在前漢隸朔方郡嗣後代有變遷迨金元之後隸夏州治省併無常終明之世地不內屬歷代文物典制散佚無稽欲考臨河賦稅成法斷自民國十四年臨河設治始特作臨河賦稅紀略

一 臨河縣政府徵收賦稅項下

甲 杭錦旗元字段地原額一千五百頃官租每地一頃額徵銀一兩八錢照每兩合

洋二元一角計算應合洋三元七角八分附加辦公費一成縣府留支七釐解廳

三釐其未升科之地一律自十八年起每頃徵短租三元作為縣府行政經費

乙 杭錦旗官租照章丈青收租十七年共丈地六百餘頃徵洋一千八百八十一元

八角六分九釐十八年丈地七百四十九頃六十三畝八分三釐徵洋二千八百

三十七元一角九分

丙 契約每田房產價百元徵正稅六元附徵財政廳辦公費二成洋二元教育費洋
二成洋二元計價一百元徵正附稅十元

丁 紅契應徵全稅白契均徵半稅

戊 印花稅十四年銷洋六百二十二元七角三分十五年銷洋二百零八元十六年
銷洋八百七十四元八角十七年銷洋九百七十五元七角七分十八年銷洋二
千三百三十七元均照定章百分之十提成留縣作辦公費

一 臨河烟酒事務第四區分卡設置規制及稅率定額

甲 分卡於十八年二月一日設立

乙 分卡因係創設所有稅收比較尙未規定

丙 臨河烟酒稅全境全年約收洋兩千元

丁 臨河全年烟酒牌照費約收洋八百元分兩期交納

戊 分卡設卡長一員月薪洋四十元馬巡二名每月每名工食洋十元

己 分卡公賣因係創設尙未定額

一 臨河塞北關分卡設置規制稅率比較各項

甲 分卡於民國十七年二月間創設

乙 分卡在縣境計有三處一縣城一秀華塘一黃羊木頭黃羊木頭之分卡本年二月奉令移設陝壩并令臨河城稅務分卡事宜歸秀華塘分卡兼辦

丙 各分卡稅收比較自民國十五年地方多故收數銳減并未規定比較

丁 各分卡各設卡長一員經徵員一員稽查一員馬步巡各二名

戊 各卡長月薪三十五元經徵員稽查員月薪十五元二角伙食每員每月洋四元馬巡每名每月工伙食費洋十三元二角步巡每名每月工伙食洋六元每月公費洋二十五元

己 國貨稅額按值百抽二五徵收洋貨按值百抽五徵收如持有運照或子口票等件概不徵稅每件徵收手數料費銅元四枚

庚 無論何項貨物一律照正稅附加十分之一徵收

一臨河統捐局徵收捐厘項下

甲 統捐局舊名清源局臨河未劃分以前僅設秀華塘分卡一處至十四年設治後仍舊設卡至十六年九月改名統捐局

乙 總局設局長一員月薪一百二十元文牘會計經徵各一員月薪三十元分徵即卡長月薪二十八元書記八員月薪十六元稽查四名月薪二十元馬巡五名月支工食八元巡士七名月支工食十元巡丁七名月支工食八元

丙 分卡五處第一卡駐善丹廟第二卡駐秀華塘第三卡駐鎮番泉第四卡駐天義生第五卡駐東西場分巡處二處第一卡分巡處駐太陽廟第二卡分巡處駐陝

壩

丁 每卡額設分徵一員即卡長書記一員馬巡一名巡士巡丁各一名其餘稽查書記等餘額仍由總局指揮分駐分巡處及各卡審察事務繁簡互相抽調概不拘

定

戊 每年比較以八萬元爲準徵數不足比較

按志書體例本境所有國家徵收機關於百貨徵額

如值百抽若干
附加若干

及每年實收數目若干均須

詳載以資徵信本局對此不憚詳求如縣政府歲租印花塞北關百貨正附稅均得其確實徵額獨統捐局函覆以捐收名目繁難一時實難抄送故本局編纂對於統捐捐額略而不詳特此註明

己 屠宰稅爲統捐局專管事項據函覆屠宰稅一項已於十八年度以包額四千四

百元准李子英承包一切手續可向該包商調查

一地方公益捐款項下

甲 牲畜捐向來指該款爲警團專款

每馬騾牛一隻均捐洋四角
每羊一隻捐洋四分

附加二成作爲教育補助

費該捐款如不敷警團開支則由地畝或商捐彌補

乙 地畝攤捐如教育農林道路義倉營繕以及區社及地方教育公安財務建設差

務各局并商會一切經費均係量入爲出以預算之多寡爲攤派之數目近三年每水地一頃攤捐不過十三四元

丙 商捐擔任公益費全部十分之二由商會徵收交財務局存支

按臨河自十四年七月設治凡關於修建城垣公署局所及設治局行政經費議定呈准由地畝攤捐每地一頃捐建築費洋五元捐行政費十元當以亟於建築徵收建築費不敷開支呈准由行政費挪用二萬餘元准由達旂地畝局荒價附加建築費項下挪還行政費迨至十七年行政費無着經王前局長文墀向道署呈請改縣因與定章不符不得已呈請由地方地畝照前定捐派行政費前例五份之一徵收每頃照收洋兩元并下不爲例呈准有案迨十八年十月改升縣治行政費仍歸無着經彭縣長繼先呈請仍由地畝攤收凡升科地准予留支官租作爲政費不再加派外凡未升科之已報墾地及外墾地一律按每頃收洋三元以昭公允而利推行

水利沿革利病紀略

西北之大利在農田農田之命脉在水利自來開闢西北他務未遑首先經畫水利爲唯一之要政河套渠道縱橫卽古人溝洫遺法古者遂人治野制其地而溝封之一夫百畝夫間則有遂十夫有溝百夫有洫千夫有澮萬夫有川古曰川澮卽今日河套之各幹渠也古曰溝曰洫曰遂卽今日河套各枝渠子渠也至匠人爲溝洫法起於二耜爲偶終於廣深四仞爲川卽河套治渠土方之制也至稻人掌下地之稼以潴蓄水以防止水備乾涸也以溝蕩水以遂均水欲流通也以列舍水以澮瀉水防汛濫也卽今日河套治渠築堰築壩劈稍放退水之法也地猶是地法猶是法善用之有利無害不善用之有利亦有害有明徐御史貞明注意西北水利嘗裹糧從二三屬吏週歷經度之信其可行疏陳十二利碩謨大計切實周至所謂小試之則小效大用之則大效也旨哉明季周用之論水利也謂大禹治水神功不過盡力溝洫誠以天下皆溝洫天下皆容水之地天下皆治溝洫天下皆治水之人水無不治田何所不墾况西北水利有基可圖不必創也善因其利而利之而已特作水利沿革

利病紀略

論永濟渠沿革及利病

永濟渠爲河套各渠之冠又名纏金渠何以曰纏金或因渠水潌纏作金碧色象形而名之歟或謂渠水寶貴價重兼金取義而名之歟抑因蒙旗地名如蘭鎖之例而名之歟均未敢臆斷也按永濟渠創於何人關於何年莫可詳考聞諸故老云渠在道咸之季有地商四十八家公共經理今之公中廟卽昔年地商釀貲建立公共議事場所規模亦壯闊哉當時各地商包租蒙旗外墾地連阡接隴用水均仰給於該渠渠道平時歲修及臨時要工地商等按釐出貲通力合作儼然有同利共害之團體當其生地甫闢渠水暢旺歲告上稔每年灌地三四千頃收糧數十萬石惜價值低落不能遠販古人所謂粒米狼戾紅朽堪虞恍然遇之此爲永濟渠全盛時代迨至同治初季西師勦匪凱旋大兵就食永濟渠列壘百里拆聲相聞各大商竭力輸將絡繹不絕不三年悉索敝賦搜括殆盡兼以軍民雜處農事日荒渠工日廢各地商坐是失業強肉弱食爭相雄長爭地爭水械鬥劫奪儼然敵國起視該渠決

決巨瀾變而爲涓涓細流矣此爲永濟渠中落時代迨有清末葉光緒三十年中朝派貽欽使來綏督辦墾務收永濟等渠爲國有又規畫養渠之法勸蒙旗將附渠各地永租歸公所謂永租者永租歸公不再放墾之謂也按永濟渠屬永租地計八百五十頃始則渠歸官辦積弊叢生迨入民國改歸商辦減歲租每頃繳銀一十五兩著爲例該渠包商楊君茂林爲水利專家精心果力能衍王氏濬川之傳而參其變平日經營渠道以培養花戶爲第一要義謂花戶聚而後合作始有力花戶富而後大工始不誤早作夜思浴雨柳風統籌全局爲之闢渠口濬渠道開渠梢沾溉日宏收益日增村廬雲屯鷄犬相聞此爲永濟渠中興時代是時也當事者應如何獎勵而扶持之俾令克厥全功何意功未及半又改歸包商李蘭青承包李包商既少實力又乏經驗舉全渠大權盡付之渠頭之手渠堙地蕪毫無成績獨其蓄水放稍一節尙足差強人意初永濟渠放稍入五加河僅流到距正梢七十里韓烏拉爲止七年夏河水盛漲永濟渠餘水充溢勢不能容五原王知事一面諭五加河下游各地戶迅濬河身預備引水又諭李包商曰與其閉水自利何如放水利人務將餘水盡量洩放以

灌下游向未上水之地果爾遵照宣洩不惟五加河上游足用卽下游梅令廟萬和長烏蘭腦包大樹疙巴以至二分子此二百餘里內莫不旁匯交通計本年增澆地不下三千頃且永著爲例傳曰仁人之言其利溥哉其此之謂歟九年又改歸灌田社包辦無效十一年改歸匯源公司包辦又無效十四年國民軍石旅長友三總辦水利收各渠官辦仍無效迨十七年春墾總局大開水利會議廣集羣思俯順輿情始定官督民辦之法各渠各立水利社以本地之公正而兼熟習水利者充經理治渠之法始漸入軌道焉永濟渠水利社第一期經理韓君增祿第二期經理汪君治泉均老於水利經劃秩然此爲永濟渠由商包官辦改良時代此永濟渠近百年來沿革之大略也按永濟渠在民國以前襲用舊口進水不暢渠身寬不過五丈梢寬不及三丈長度不過七八十里自包商楊茂林重修渠口渠身加寬至七八丈長至一百四十餘里近年渠身通暢寬至十餘丈八九丈不等每年澆地不下三四千頃規模已大定已所有亟需改進者約有三端一曰濬渠梢以暢尾閘渠猶人身開疏胸膈以通其來路必先利導腸胱以洩其去路渠梢偏窄渠身水積不能容勢必旁決橫衝激

成裂腹穿脇之患惟開梢工鉅不在歲修之例可呈請公家補助半費由地畝攤出半費則欸易集事易舉水患可永杜矣二曰建石閘以圖經久渠中築壩向來全恃土料少則需欸數百多則需欸數千築拆煩難澆灌不免稽延起閉拙笨渠流不免淤澄何如改爲石閘運用從心操縱在手計每閘需五尺長一尺寬厚石條五百件合以人工灰料不過萬元分土中下三游建三閘較之常年築壩似費實省一勞永逸何便如之三曰加高培厚以防漫溢堤岸種樹以固堤防重修工房以資聲應歸縣府專管以便指揮又各渠所同不獨一渠爲然也是在留心水利者加之意焉

蘭鎖渠記事本末

渠何以蘭鎖名以地名也地何以蘭鎖名地爲蒙地襲其名未通其義無定字亦無正音也如高阜蒙人名爲腦包又名淖包又曰惱包也渠創於何代建於何人無官書無碑碣無百年世族傳聞異詞莫可詳考自前清光緒三十年貽欽使來套辦墾注重渠道地商李君振海治農業於五原西偏規模闊大與五原濬川王氏先後相望見蘭鎖渠久湮不治慨然以

興復爲已任於是虛心延訪各水利專家集羣思探衆議按諸實地試驗反復測勘比較其遠近高下之勢參合其順逆向背之宜出鉅貲庀衆工分段濬修披星而作戴月而巡冒風雨犯霜露巡察督課未嘗少息止勤者賞人知勸怠者罰人知愧且勸且愧是以工無曠而事易集計自渠口下渠正身至烏蘭腦包長三十餘里寬五十五尺深六七尺自腦包關兩梢一則通蘭鎖大櫃寬三十尺深六尺長四十餘里一則通丹達木堵寬三十尺深六尺長三十餘里上游利在合所以蓄其全力下游利在分所以暢其末流分合運用在乎一心所謂行所無事非歟渠水每歲澆地六七百頃沿渠廬舍雲連村舍駢列聲息相援守望相助豈第一方一家之利哉若李君振海者殆真能殖我民生洵非托之空言者矣

論黃土拉垓河渠地沿革利病

按黃土拉垓渠全部地舊隸達拉旂渠創於有清初葉河曲楊氏其得名之由來渠舊有黃土淖包一座蒙人呼淖包亦曰拉垓故以此名渠渠主楊氏名字及該渠始創規模久已無傳至咸同之季楊氏中落渠堙失修沃壤荒蕪至光緒末季庚子教案發生達旂蒙民與天

主教失和迨聯軍迫京都清廷無暇顧及邊地外人遂單獨提出條件向綏遠當道及蒙旗嚴重交涉要求賠款銀十四萬兩綏當道與蒙旗協議以黃土拉垓渠地全部作爲一千四百頃抵賠教款銀十四萬兩當時外人條件異常苛虐時值我國不知外情及國際公例冒冒然許之遂令大好沃壤爲外人殖民地自光緒三十年外人接管後渠兩岸教堂逐次林立如陝壩蠻會大發公玉隆永勝家營子烏蘭淖丹打木堵始則七所迨後丹打木堵教堂取消又添三道橋黃楊木獨二所每堂設傳教士一二人施展其半麻半醉之侵略教化以愚我不識不知之貧民計夫授田按田分廛令我民衆負耒而來仰其鼻息以爲生活復於教堂附設學校俾全部教民子弟終日從事於誦經祈禱使人人只知有教務不知有法治只知有教士會長不有官府治外法權岌岌乎消磨於無形中良可悲已迨歐戰以後我國國際地位日進外交亦因之日有進步十四年臨河分治蕭局長振瀛對於黃土拉垓渠地幾經交涉嗣因奉調東去未果十五年東魯于局長景文對於該渠地日謀所以收回歸爲國有迭次召集紳董會議議決迭函鮑教士到署商洽鮑教士屢以請示總會爲辭事又中

止迨涿鹿呂局長來宰是邑呈准綏政府正式組織收回黃土拉垓河會議以書面邀請鄧教士到會該教士屢爽約不到復呈准以無條件收回派田委員全貴接收該渠計渠長一百二十餘里派石委員以驥接收該地計地一千零八十頃是役也舉三十年沉沒之領土一旦還我故物復我主權破我民衆昏昏之迷夢何幸如之何樂如之查該渠重修於民國十年外人借楊家河之渠所得之利益五萬餘金逐漸開渠所定歲修章程備極周妥該渠口在黃楊木頭東南十餘里出水由勝家營子村西北十餘里入五加河小支渠密如蛛絲大支渠計有蠻會大發公善召渠三道均長十餘里十七年包西水利局改爲包西水利管理科又踰年復改爲包西水利管理局每渠設水利社設經理一副經理一董事長一均由能種一頃地以上之戶推選十七年該渠水利社李臬當選爲經理劉期副之傅正業爲董事長辦理二年雖無成績可言尙能奉公潔己循從前辦事之舊章詎意十九年改選經董後迭次會議均主張將該渠上游劈寬六丈而對於下游並未計劃當時冒冒然通過冒冒然實行適值本年大河水勢異常洪漲該渠既經劈寬廓乎有容凡上游之地均可上水餘

水愈積愈大滔滔其來爭趨下游乃渠身逼窄容量太少以致決口數十道淹田二百餘頃是豈天災之靡常抑亦人謀之不臧耳作者無水利常識又無水利經驗竊嘗與二三水利專家晨夕過從亦嘗聞其緒論矣治渠猶治一身也疏導其胸膈以順其來路必先暢利其尾閘以開其去路設令尾閘不暢腸胃必致壅塞愈塞愈積勢必有穿脇破腹橫決旁衝之虞治渠亦何莫不然開寬渠口以利之入開寬渠身以使之容尤須開寬渠梢以使之洩此自然之理也三尺童子均知之不待有常識有經驗也自來善治水者無他焉曰公曰平而已無人已彼此之見存此之謂公無大戶小戶貧戶富戶之見存此之謂平以此治水何水不治然則黃土拉垓河渠善後之策可一言蔽之曰加寬渠梢而已渠身外民地也渠梢外亦民地也情形同也渠身之民地照章出費也渠梢之民地亦照章出費也其義務亦同也如之何待遇不同也且渠梢加寬亦非難能之事數十里之工程二三千元之經費借全渠通力合作之餘力分當事者醉舞酣歌之餘神但能多盡一分規劃民間卽受萬分之保障此則渠梢各花戶日夜企望口不敢言而心竊默祝之者也曲突不及徙薪亡羊尚可補牢

曾創修楊家河子渠紀事本末

按楊家河子大渠爲後套各經費渠之冠其水利之宏深溥博與永濟官渠相埒時是渠開創前該處百餘里均沙梁耳自有此渠地加闢民加聚萬畝田歌千家烟火蓬蓬勃勃遂有日新月異之勢臨河之有四區也楊家河子渠爲之也誰謂水利之於地方無絕大之關係耶按今之楊家河子渠襲舊渠之名非襲舊渠之地也舊楊家河爲臨河西界西場楊氏創修於清嘉道年盛於咸同時代至光緒初季楊氏中衰地蕪而渠亦與俱堙詢諸故老舊渠規模狹小水利局於一方較新楊家河渠其大小廣狹不啻倍蓰當民國初元河曲楊君茂林以水利專家包辦永濟官渠因勢利導三年水利大治嗣爲有力者撓奪之不得竟其所施於是偕其諸弟春林文林鶴林週歷河套至烏拉河東畔審度河流詳察土宜見夫該地泉甘土肥昫昫膺膺百餘里一望沃壤亟待開闢慨然興殖我民族之思奮臂起曰欲爲我民族開百世之利爲我地方啓新造之區莫如就地開創一絕大規模之渠道庶幾其有濟乎時有尼之者曰先生之志則大矣其如工大費鉅何茂林蹙然曰我國人日日言實業矣

殊不知公家無實業社會有實業社會團體無實業社會個人有實業我輩不言實業則已如真欲著手實業也求人不如求己分任不如獨任之爲愈也於是相度地勢決定在舊渠迤東開創渠道時在民國五年冬預籌渠工糧欸備購器具又復週巡測勘延請各水利名家往復辯論以折其中六年春庀工聚材開始修濬由毛腦海口重開渠口茂林先生躬親督工往來督課指揮夙夜無稍怠乃弟春林文林鶴林分段監視披星而作戴月而息迄六閱月開至烏蘭淖計生工已四十餘里沿渠地高亢上水無幾是時耗欸已數萬矣族黨咸友爲先生危先生夷然守常度氣不稍挫爰與陝壩各堂教士商洽以各教堂包租之蒙地作爲地股每澆地一頃有以平分計算者有以七五計算者支配分利始得源源接濟盡以所得利益以充工費七年開至哈喇溝八年開至二道橋計大工已及半矣是年渠水不旺收益奇絀兼以地方迭遭匪禍兵災市面凋敝金融無可週轉渠工虧欸萬餘元工人五六百名踵門日責索汹汹不可解勢頽殆矣先生舉全家之衣物簪珥牲畜器俱變價償還工費不足又重息稱貸而補之爲地方興利不惜毀家以紓難事後兄弟無後言婦子無評語

先生之信孚內外可知已九年遭黃虫災霉爛殆盡十年收成奇絀浩浩大工進行無貲中止不能如登山者阻中道巉巖莫攀如涉海者陷中流危柁欲折借非有堅忍性貞毅心何克度此難關語云打牙和血吞又云豎起脊梁立定脚此之謂歟十一年開至蠻會梢退水渠十二年開至三淖梢退水渠此楊家河渠正身開濬經過之大概也計渠身長一百四十餘里寬八九丈有差深丈餘其開修支渠也第一道爲黃羊木獨渠長七十餘里寬兩丈四尺第二道爲烏蘭淖渠長六十餘里寬兩丈四尺第三道爲老仙渠長五十餘里寬兩丈四尺第四道爲三淖渠長八十餘里寬三丈此最大之支渠其他各小渠密如蛛絲綺交脈注不可勝紀計全渠每年能澆地兩千頃三千家賴以舉火焉按茂林先生天性篤厚敦內行資姿穎悟其先德擅長水利茂林髫年隨侍每行渠畔進茂林隨地指畫輒愷然有會稍長入而講求出而實驗日覺親切有味遂視水利爲唯一之事業每興一工徧集當事者令抒所見已乃參合已見往返駁論以求其至當其有不合者鮮矣卽間有格礙而仰而觀俯而察伏案兀坐繞室旁行臨流癡立終日終夜忘食寢迨至豁然通憬然悟泊乎其有得也則

有大呼狂喜覺人世之樂舉無以易此者先生有弟八人皆一門之秀均能踵起而世其傳
春林鶴林尤日侍先生而得其秘授是役也春林專司其渠工庶務外交諸務鶴林專司籌
備欸糧貨物並支發諸務相資爲用正其相得益彰矣嗟乎在民國四年前近渠百餘里舉
足荆棘觸目汗萊茂林先生不過當地一紳董耳既非坐攤厚實可以左右人民又非手握
大柄可以號召民衆而挺身獨任取甌脫之地而獨力闢之取久湮之渠而獨力開之坐令
化礮爲肥化瘠爲沃起萬畝之芳塍黍油麥秀開百里之繡陌耕雨鋤雲致令肇造新區重
開天塹不惟一方造福粒我蒸民爲省防計爲國防計爲實業家創新模爲軍事家立要塞
有益西北大局豈淺鮮哉迄今春林鶴林諸弟守其成法爲之疏其幹暢其支揚其波助其
流令我民衆擊壤鼓腹樂其樂利其利何莫非茂林先生之賜哉

教育紀略

臨河地處絕塞跡限遐荒兩漢隋唐間設郡縣而旋省旋併典物飄零忽夏忽夷文教睽隔白茅黃草莫發芹藻之香蠹幕駱漿難翹菁莪之秀梯航不出百里太史停采風之軒游牧溷跡兩河學士返問俗之轡自清末報墾而漢民始願受廛自民國分治而文教始萌胎胚究之地囿蒙俗文化遲開步步甘讓人後無如何也欲紀臨河教育經過請斷自十四年設治始特作教育紀略

民國十四年秋八月縣立初級小學成立

按臨河未設治前地方隸五原西區民國六七年間王知事催令辦學經紳董在強油坊丹打木獨白爾塔臘等處均設有小學當以迭經兵燹規制缺略旋興旋廢泊十四年設治經蕭局長在縣城先設小學一切章程均照部定以資提倡

十五年各區設小學一所

十六年三月教育局組立

臨河教育局組織法及規程

第一條 本局依教育廳頒布教育組織條例與縣政府組織條例組織之

第二條 本局設長一人承教育廳及縣政府之命綜理全縣教育行政事宜

第三條 本局設督學員二人承局長之命職掌督察指導其職務如左

一關於縣內各教育機關對於教育方針及法令遵守狀況之督察宣傳事項

二關於縣內教育機關設施狀況之督察指導事項

三關於社會實況之調查及社會教育之推廣事項

四關於調查表格測驗方案之填記事項

五關於教育機關人員之考績事項

六關於教育機關經費之支配及用途之督察事項

七關於縣內教育方案建議事項

八關於其他督察指導事項

第四條 本局暫設事務員一人承局長之命職掌一切事務其職務如左

一關於會計及庶務事項

二關於預算計算決算之編製事項

三關於文件收發校對及保管事項

四關於統計報告事項

五關於文書之繕寫事項

六關於其他事項

第五條 本局遇必要時得添設事務員一人或二人辦理本局一切事務

第六條 督學員除督察指導外須駐局內輔助局長處理局內一切事項

第七條 本局暫設書記一人遇必要時得酌用僱員一人或二人辦理局務

第八條 本局爲謀教育發展及局務便利得設委員會研究之

第九條 本局辦事細則另定之

第十條 本法規如有未盡事宜得隨時呈請修正之

第十一條 本法規自呈奉核准之日施行

秋七月縣高等小學校初級女小學校成立

按兩等學校設校長一員國文教員一員科學教員一員文牘員一員夫役兩名高級
第一班學生十名第二班學生十名初級班學生三班共六十名全校每月薪費洋一
百三十八元現又加至一百六十元初級女校設教員一員學生二十名夫役一名全
校薪費洋五十八元現又加至八十元

冬十月縣立兩等學校初級女校校舍建築落成

按兩等學校地址面積寬長各三十丈操場寬長準是大門一楹大講堂六楹東講堂
三楹教員室三楹學生休息室六楹廚房兩楹女校地址面積長二十丈寬十丈前後
大講堂各三楹廚房兩楹兩校建築費洋五千元

十七年春各區初級小學校成立

按各區小學逐漸擴充至十七年春已報成立者計二十處

十八年春三月各村初級小學教授管理法照部章頒行

四月全縣學校組立學生運動會

按各區實行村制全境共組兩鎮二十村每村鎮一區設小學校一所是年四月王教育局長鑒於學風不振奄奄疲茶無起色特呈准組立學生運動會以是月十五十六兩日爲會期與其事者有高等學校高校長建章劉教員象日趙教員存南督學員張國翰張毅辰前女校教員耿秉信教員海桂芝及毛君萃良班君子儀律君聯璽分董其事學生到會者四百餘名主席爲黃設治局長彥邦外賓有檀旅長林楨李團長根車統捐局李局長潤公安局郝局長晉綱電報局黃局長昌建設局楊局長春林財務局李局長增榮一區區長李元楨二區區長陳占財三區區長傅正業四區區長楊鶴林中西醫士田信之計運動課程則有植竿跳高立頂跳高跳遠提燈競走頂囊競走

縫紉競走跳繩競走算術競走拋球競走奪旂競走八百碼競走四百碼競走打籃球
比賽智者角智材者角材勇者角勇踵相接袂相聯絕塵而奔攘臂而進人人有競爭
之志氣人人有競爭之精神是役也邑之人傾室觀憑軾望神爲眩目爲悚舌爲僞足
爲側舉欣欣然相告曰初何料吾邑學子奮發猛厲一至於此也此又何事不可爲何
業不可就也噫嘻此一舉也爲我學界雪虛聲之恥爲都人士鼓向學之心所關顧不
重哉王局長文墀又慮夫各村小學校教育費就地籌欸之不公平也特提議一律
按地攤派以劃一之又慮夫師資不良教授不能一致也特提議設訓練所以訓練之
又慮夫教育費向無的欸不足以經久遠也特提議每種地一頃攤抽糧二斗計共攤
糧八百石撥案減半價可領地二百頃以爲基金而厚培之王局長可謂知教育之先
務者矣

秋九月設民衆閱報所

按臨河風氣閉塞民智未開議定就東關街公所附設閱報所縣署及各機關捐報若

干每月應支公費由地方欸挹注之

十九年春重申第一高小學校及各初級小學校制

按臨河城關各村學校經近年整頓勤加督查訓練日有起色本年春季復由彭縣長令教育局通令各校遵照部頒四二制課程方面現採用新時代課本逐漸整理當然依次就緒計全縣各校職教員三十六員女二員學生統計八百四十五名女生四十二名至全境教會學校計有六區向來課程課本往往自爲風氣甚至攙加聖經禱辭近來經教育局暨督學員正式指導亦逐次就範現又通令遵照部頒小學章程實力履行議定經費半由教會半由地方分認互相輔助而策進行又查社會教育如露天學校通俗圖書館講演所等項或限於人才缺乏或困於財力支絀又以近年災荒迭告地方多故旋議旋罷現在正值地方粗平風氣日開教育當局正在策畫進行中未敢視爲緩圖也

按教育原則有三曰學校教育曰社會教育曰家庭教育論其全體則家庭爲本學校

社會爲末論其大用家庭爲先學校社會爲後古人重胎教立姆訓講少儀讀孝經卽家庭教育也今歐美之幼稚園等設置亦卽家庭教育也通古今中外凡夫魁儒傑士功名勳業震耀寰宇者莫不由家庭教育而起醴泉必有源芝草必有根其所蓄積者然也我河套地染蒙俗向則由游牧而成部落今則由部落而始立郡縣舉不知家庭教育爲何事此何怪夷秀穎於荊榛委良材於薪棘也欲振興河套文化斷自提倡家庭教育始一面擴充女學及露天學校平民學校使全境三十歲以下之男女無不識字之人一面參合古今貫通中外爲家庭訂定簡單平易之課程總以養其德性開其知識強其體格使小子易知易行爲標準由是切寔推行不二十年我臨河不人文蔚興人才踵接者未之有也願告之關心地方者

商業建置紀略

河套自古及今地方之變遷凡三運一運爲游牧時代再運爲耕畝時代三運爲懋遷時代自有清之季雍乾內蒙歸誠以後而漢蒙始通往來自道咸地商闢地以後而漢族始有交

易至其通市伊始均係以有易無交易而退其風近古自近年地力日闕民戶日聚列廛設市商業始萌芽究竟地固一隅交通梗塞貨少則壟斷病民貨多則壅滯病商商人無雄厚之資本無經濟之常識是亦關心市政者所當策勵以圖之也作商業建置紀略

(甲)商會組織沿革之經過

按臨河自十四年設治時因商務未興農會商會合組亦臨時變通之計第一任會長于相龍因比年地方多事諸務未遑經畫洎十六年冬正式改選張文煥被選爲第二任會長以于相龍副之當時經制漸備粗具規模十八年六月改選劉珍被選爲第三任會長于相龍董繼舒副之十九年夏奉令改爲委員制經合縣會員推選劉珍被選爲主席會中設文牘會計書記各員其餘組織悉如制惟會址向於農會合建迭經軍興地址遂久爲軍隊佔據十八年農會停辦商會暫借商號辦公十九年四月始在縣府西北民房爲臨時辦公地方是秋七月於縣府後街擇地建房十一楹商會自此始有定址焉

（乙）商會經臨費之徵集

按商會每月薪公洋一百四十一元雜支費洋三十元常務員五員每員每月膳費洋十五元交際費五十元均由本縣各商店攤款項下開支攤款辦法按各商資本大小規定釐股能任一釐股者月捐洋一元不能任一釐股者每月酌攤

（丙）商業概數之統計

按本縣設治未久迭次招商設立行棧迄未實行統計全縣貨舖約有二百五十餘所

（丁）商業出入口銷路之比較

按本地商貨出口品以牛馬騾羊絨毛糧米皮張爲大宗銷數價值歲計約在四百萬元左右入口品以茶布烟酒糖紙爲大宗價值歲計銷數價值約在三百萬元左右兩相比較出口銷數盈餘在百萬左右

（戊）銷耗品粧飾品之銷數

按本地每歲銷耗品約計五十萬元以上粧飾品約計十萬元以上

(己) 全縣歲輸稅釐捐之概數

按本縣百貨營業歲納稅釐捐約計洋六萬元以上

(庚) 漢蒙交易貨品之名目

按本地漢蒙交易以糧米布茶糖及牲畜羴毛皮張爲大宗

(辛) 蒙旂需要品及漢商交換品之名目

按蒙旂需要品以糧米糖布茶酒爲大宗漢商換得品以皮張羴毛牲畜爲大宗

(壬) 漢蒙交易通用貨幣之標準

按漢蒙交易除以物品交換外均通用中國國幣或間用俄幣照原定價值計算

并不折色貼水惟均以現幣爲限紙幣不能通行

(癸) 漢蒙交易度量衡之通行

按漢蒙商業出入向均通用中國之度量衡以爲標準惟蒙人買賣布疋間有論方者

仍以中尺爲比例

臨江府志 卷中
三
(子)出口商販經過蒙地之規則

按後山內蒙爲烏拉特前中後三公旗外蒙所屬分四十八家合哨漢商在蒙地營業須由該商先指明在某旂或某合哨地交易掛號交納營業捐若干卽准在該處自由貿易概不禁制惟不得越境開設舖號然能禁漢商越境賣貨不能禁蒙人越境賣貨是亦中國任客投主不加限制之常例至所謂在蒙地交納營業捐並非蒙人稅課亦似內地各處商家之舖捐所謂在該地經商享其權利卽當盡其義務也再蒙旂地面向未設征稅機關惟俄人強干外蒙內政居然在蒙地設局卡征稅且稅率苛重如有漢蒙貨物經過該局卡均照值百抽十征稅卽漢蒙商販攜帶銀洋亦值百抽五征稅是不惟我國際上橫生窒礙亦我國商務上受若大影響也果何以挽救而維持之哉

(丑)本境商業金融之現狀

按本境近年多故金融紊亂達於極點現已奉令將本地各商號所出號帖小票責成各該號一律收回全縣金融在市面流通者計有綏遠平市票十五萬元善後流通券

五萬元豐業銀行票三萬元綏遠總商會票一萬元平市官錢局及綏遠總商會零角
票一萬元共計全境流通鈔幣約二十五萬元以上

交通紀略

地方交通有四大政曰郵曰電曰道路曰輪舶臨河地處邊荒龍堆草白中道廻采風之輻雁磧沙黃臨流返問俗之轡聲息局於一隅梯航不出百里交通梗塞莫此爲甚近年地方設治當道對於交通要政逐漸改進而或限於章制規模未宏或限於財力推行未暢是亦無可如何者也特作交通紀畧

一曰郵政

按五原當民國二年改縣以後僅設郵信代辦所一處自十四年臨河設治五原改郵櫃爲郵局臨河設治局注意郵政請於交通當局在臨設郵信代辦所因津貼寥寥由設治局每月津貼洋六元藉資維持然文書遲滯信件錯落往往不免而匯兌及郵包僅及五原而止商民大感不便自十七年秋季設治局停止津貼郵櫃益難支持黃鶴音沈青鸞信梗居者秋水望穿征人春雲盼斷矣當地紳董悉心調查按郵局章程非月銷百元以上之郵票不准設局事經開議籌商情願由地方每月代銷郵票百元函

請郵政當局設局如果實行則由塞之通郵政之轉機在此一舉近日已照章設立三等郵局開始通行矣

二日電政

按五原於民國四年縣署由包移套經王縣長呈准設立三等電局於隆興長時值軍興時期聲息靈活成效昭著十四年臨河設治蕭局長呈准設電報房於縣城規定由地方每月補助電報房洋一百二十元凡關於設治局官電及地方之公電均一律免費此係臨時單行法純爲便利公務起見也乃五原電局逕向電報房每月提取款項臨河商電本少電報房全部薪費每恃地方幫款藉以敷衍更何有餘款補助五局且焉有以地方補助之款取而補助他局之理迨十七年電界奉一律收費之令臨河亦照章收費官紳據理力爭謂臨河邊要自應由公家設立電局經費由公家擔任無論何項電報自應一律取費乃公家既不設局又不發款惟此電報房經費全由地方補助地方既有出款之義務自應享不收費之權利若既出補助費又交電費是盡兩重

之義務而僅享一重之權利豈得謂平云云呈上不報是年冬黃君昌來領是局曲意調停補助費仍由地方擔任電費暫時記賬所願商電日增正式收益日多地方免盡補助之義務公家實行收費之章制此誠兩全之道矣十八年冬彭縣長提議創設由縣城至陝壩電話預算購料及裝置開辦費需一千五百元由地方公認現在積極籌備次第就緒從此防務商業息息相通倘或辦有成績各區仿行血脈貫注四境響應不出戶庭可坐而定矣

三日路政

按本縣渠道紛歧交通處處梗塞當夏秋各地澆水南轅北轍卽熟悉地理且迷於嚮往路政不修良足深歎十九年綏遠政府發下賑工欸六千元議定專爲各縣修路藉資以工代賑當由本地方行政會議議決(甲)由縣城往過五大股黃羊木頭烏蘭淖至陝壩爲第一路計長五十里(乙)由縣城往西門外渡口至第一區區所爲第二路計長三十里(丙)由第一區至蠻會爲第三路計長五十里(丁)由第一區至第二區

爲第四路計長四十里（戊）由第四區至陝壩爲第五路計長五十里（己）由陝壩至蠻會爲第六路計長三十里以上各路線議由各區長督促村長召集當地貧民修築業經呈報嗣奉廳令略謂案經萬字分會周副會長晉熙提議臨河王賑欸應修築臨河縣道查得臨河縣城西至黃羊木頭轉北玉成厚烏蘭淖郭三牛犍陝壩韓巴圖以抵郭四牛犍轉東至蠻會大發公轉東南公益恒元泰隆正南經四分子大文祥以抵臨河縣城再由韓六告西修支線經德和泉趙海油房干汗廟以達陝壩又由黃羊木頭西北修支線經老謝圪卜以達楊櫃轉東北經九分子段三圪凸轉東以達郭三牛犍茲特繪具臨河區域圖並將應修道路註以黃線云云業經賑務總會議決通過函請到廳仰速按照全文所指路線辦理到縣當經縣政府召集紳董覆議僉稱周會長所指路線有須經過沙磧開築費工者有經過多數支渠轉折不便者當卽呈覆仍照本縣原議路線六道修築以維原案茲又參合廳令原文之意添修幹路四道（庚）由烏團淖至楊櫃爲第七路（辛）由縣城北門至德和泉爲第八路（壬）由蠻會大發公

轉至聖家營子爲第九路（癸）由二區永安堡經仁義堂聖家營子轉經東皮房趨東至臨河東北界爲第十路如此添修本境各路洵可謂四通八達交通無窒矣

四曰航政

按本境大河流域既無正式稅關又無重大市鎮故往來河流均係過往船筏向無公立船廠大約東下者十居八九西上者十居一二誠以順流則費輕而歷時短逆流則費重而歷時長也西來之貨絨毛皮張藥材鹽炭爲大宗東來之貨糧食洋雜貨爲大宗臨河有航路而無航權其數不可得而考焉至本地運糧均係臨時僱用小划亦屬客划居多從無操舟爲業者倘能令各渠曲達旁通則舟棹運載不三日即可周歷四境較之陸運省費省時又何難帆檣林立艫棹交集舟棹之利將日增而未有已是亦地方之幸已

兵防紀略

自古邊防大計不外築亭障設斥堠立烽墩建寨棚奠山堙谷經田安屯其大要不外因地之利設險固守綏省西部南有烏拉山北有陰山迤邐西來至大奈太兩山逼近氣局爲之一聚故余太占天險一步自余太西來北山南河地勢平衍形勢散漫過豐濟渠迤西北山南逼河流北漸至臨河西界氣局又爲一聚故臨河烏拉河占天險二步兵家學所謂要塞也自有清以前州郡省併廢置歷代變遷設防遺迹莫可詳考至入民國歷遭兵燹當道規時取勢遂趨重於防務然臨時補苴僅苟一時之安未遑百年之計時爲之勢爲之也特作兵防紀略

漢元朔二年置朔方郡縣十臨河隸之

後漢光武以并州領之省朔方郡之修都臨河呼適麻渾渠搜五縣以西河郡之大城縣隸之

晉永嘉後爲前後趙前後秦地後爲赫連勃勃所據

魏太和中改置夏州東夏州領偏城朔方定陽三郡地

隋大業初改夏州爲朔方郡

唐闕內道夏州朔方郡中督都府轄縣三

按唐朔方郡轄縣三其一曰朔方縣貞元七年開延化渠引烏水入庫狄澤溉田二百頃有鹽池二有天柱軍長慶四年節度使李德裕築烏延宥州臨塞陰河等城于盧子關北以護塞外有木瓜嶺又天寶初安北單于二都護并屬朔方郡歷八年徙振武軍此唐代朔方郡兵防見諸載籍可考者也

五代地爲李夏所有

宋地爲李夏所有

遼地爲李夏所有

元滅李夏立西夏中興等路

明初爲東勝等州城并立屯戍天順間爲蒙古所據

按明初王保保據河套洪武中追逐之築東勝等城并立屯戍天順六年瑪古里海阿勒綽爾博勒呼三部始入河套成化四年阿勒綽爾爲其黨嘉勒斯賚所殺併其衆而結元裔們都而居河套九年總督王越率兵擊逐之宏治八年北部復入河套未幾和實據之總制楊一清及總督曾銑先後請復河套均不報是終明世地不內屬兵防更不遑經畫也

清 初天聰間太宗征服其地編爲烏蘭察市伊克昭兩盟設正副盟長

乾隆元年設廳分治

乾隆二十五年設口外五廳薩拉齊廳隸之

光緒二十九年析薩拉齊廳轄境西部設五原廳

民國元年改五原廳爲縣治

按民國以前朔方郡地在鄂爾多斯旂地在北河以南南河南北統稱爲河套漢之朔方郡卽元魏之夏州隋唐因之至五代遼金均爲李夏所有元滅夏立西夏中興等路

明始終淪陷蒙古清雖征服其地末季廳分治而鞭長莫及邊防之計不詳然查咸同年間回回馬化龍構亂大軍西征河套爲大軍孔道五原全境柵寨相望烽柝不絕居然重鎮迨同治七年軍事告竣休兵纏金渠附近就食該地三載悉索一空此爲臨河駐軍極盛時代迨光緒二十九年析薩拉齊廳西部地設五原縣三十年匪首劉天佑由五原錦繡堂地方借復仇爲名號召黨徒數百人西至今臨河天德太地方扼險紮寨四出搶掠勢汹汹山西派王總兵率常備軍千人綏遠派譚參將湧發胡參將太才率八旗千人合兵蹙之殲魁宥從事旋平宣統三年哥老會乘革命軍紛起匪首楊建寅馬景濤藍玉堂等由阿拉善王旗揭竿聚衆來臨境大肆擄掠十一月攻陷強家油房墾務局搶掠一空綏遠當道派哨官張寶和率四旗馬隊平之

民國四年八月五原民警弓占元叛據東皮房綏遠騎兵一營攻不克敗潰

按弓占元之變聚衆不過三十人五原西路土默地馬場地東西場到處騷擾是年八月三十日佔東皮房五原王知事文墀迭乞駐軍一營馬營長品元馳救拒弗顧迨九

月十日派兵一連攻之遇伏兵潰三百不成列匪勢日張綏當道派鄭團長金聲率所部往剿鄭團駐隆興長月餘官紳乞援卒不報

九月寧夏馬護軍使福祥遣昭武軍統領馬鴻賓率隊援套屢戰皆捷匪遁入山

按寧綏界毗連馬軍使見套變日亟思爲固防卹鄰計派馬統領鴻賓率軍三百人來套辦匪甘軍均百戰健兒又兼馬統領調度有方屢與匪接有戰皆克斬獲無算匪窮遁入山馬統領欲掃清餘孽面商鄭團長約與入山會師於銀格爾圖以攻之馬統領簡精騎百人冒險深入至銀格爾圖鄭師爽約不至馬部馳入沙漠二百里至科布多卽俗呼爲可拔者也遇匪憩息馬軍乘其無備合團大進血戰三小時斃虜數十人匪潰圍東走是役也後山居民謂本地百餘年來不見官兵旂影今大軍從天下如霆如雷從此後山得享太平矣馬軍出山紳民椎牛釃酒載旂歡迎夾道而觀者數千人競嘖嘖頌神功不置時有忌功者造蜚語幸當事者調和之乃解

冬十一月馬護軍使福祥適拜綏遠剿匪會辦之命率軍來套西路防務以馬統領鴻賓任

之

五年三月地方肅清甘軍回寧防四月騎兵四支隊接防

按西路防地以四支隊三營全部任之分駐丹打木獨狼山灣等地

六年二月匪首盧占魁就撫全部來套編制

按盧匪就撫所部編爲游擊隊一旅旅長以盧占魁充之該部不下萬衆內有僞皇帝一部份張九才等各部份份子複雜難就範張與盧不合擁僞皇帝西去編制兩月餘卒不就緒所部借徵糧爲名四出劫掠官紳哀請綏政府罔應殆棄河套爲甌脫矣盧部分兩團一團駐烏蘭腦包二團團長各爾計駐狼山灣計自二月至五月搜糧逾七千石民間儲蓄蕩盡劫掠姦淫之案日有數起居民逃散踵相接轍相尋王知事求去不得商妥紳董分立軍糧局以抵制之自是軍隊不復假徵糧之名居民得遂安居之志秩序漸復民生賴以保全爲不少矣

十月騎兵第四支隊會一師步一二營驅盧軍出境

十八 按自盧軍出境後地方救平西路由四支隊分兵駐防歷七八九年悉如舊制十年改歸陸軍一師駐防

十一年陸軍一師步三營分防强家油房秀華堂等路

十四年春三月國民軍第八旅分駐强家油房秀華堂等路

秋七月臨河設治防務仍由國民軍第八旅任之

按是年秋國民軍開往甘境者爲劉郁芬全部

十五年國民軍全部駐套

按是年冬國民軍開往甘甯者有韓復渠部方振武部繼發者有弓富魁部陳希聖部

石友三部在臨駐防者有石海部蘇雨生部陳得勝部大辦四子部

十六年一月國民軍全部出境石海部東往防務由郭旅長鳳山王司令英分任之

按郭係奉軍所部王司令英部由護路隊改爲第三十四師以王英爲師長統之嗣郭旅東調防務由王師獨任之時有楊團長壽臣廣團長林駐二區侯團長子清杜營長

子玉駐一區李團長占彪金團長寶山分駐三四區尋升李占彪爲六旅旅長以李團長鳳山劉團長致祥分駐之他部東調

十七年冬季旅長占彪去職以袁旅長占鰲代之劉團長部調察以楊團長子清代之

按是年十月匪首趙青山率全服竄擾全境賴袁旅會譚旅合力追剿十八年一月趙匪四竄賴趙司令承綬郭師長鳳山會王師長英所部合擊出境尋該匪首在五原授首始告肅清

十八年三月袁旅調包以二師一旅王旅長奎元接防以所部蘇團分駐各區五月令王旅魁調五以譚旅長林楨代之以李團長根車王團長樹棠分駐之

十四按是年二月回匪攻陷寧夏經國民軍返攻驅該匪至距臨西路之大灘約萬餘餓軍十侵擾臨邊殆無虛日幸檀旅長操縱合宜恩威並濟該軍互相携貳日漸解體去檀旅長捍禦邊防消弭鉅患功足多焉

十八年譚旅長辭職仍以王旅長奎元代之王團長樹棠步營賈營長燕如分駐之

十九年旅團駐防如舊制

按臨河西通甘寧東障包綏南臨秦晉北控蒙疆省防國防重重鑄鍵况蒙俄窺伺蠢蠢欲動設一旦有事臨河首當其衝閒嘗登高縱覽襟河倚山天然形勝且腹地渠道縱橫紛糾套搭天生濠塹處處可限戎馬此軍事家不可必得之形勢而坐攬其勝置堡設墩固可便一時之封守屯田立戍亦可成萬世之金湯是在當道以全力注之也幸甚

風土習俗紀略

積千百年之涵育薰陶積千百族之服習觀感而播爲正風蒸爲善俗此其道在因積千百年之封蔽錮蒙積千百族之附會沿襲而流爲變風傳爲陋俗此其道在革是故省方采風入境問俗而其國之政教可知也卽其國之人心亦可知也臨河在鄂爾多斯旂界其人善游牧好騎射相沿成俗由來已久漢唐雖經邊置郡覃敷文化然而忽華忽夷倏興倏廢治日常少亂日常多歷代風土習俗蒐采難詳自清末開墾而漢族始聚自民國分治而聲教始通究之風靡不競俗雜不純爰舉近年里閭之流傳以資後日訓型之根據特作風土習俗紀略

一 商業習慣紀聞

按民國四五年前套地交易純以銀爲本位市面尙沿用生銀納價者探囊而予收價者啟櫝而藏色不折平不較有古風焉民間通行貨物以茶烟糖布爲大宗往往以有易無入市者不持一錢歸市者飽輦百貨何便如之近十年來市上現銀如麟角鳳毛

近五年來市上現洋如晨星碩果紙幣充斥錢賤物貴商人利競錐刀無裨筐篋時勢遷流安得起而挽救之也

二 農業習慣紀聞

按河套農業以渠水爲命脉諺云地隨水走人隨地走甲歲南阡成聚乙歲北陌列塵民無恒業人無定居勢使然也所謂農功者耕不必深耕不必易坐貪天功不盡人力而載收載穫即滿篝滿車地有餘力然也民國初元本境糧價奇絀斗米百錢石穀一金不能販遠只有囤藏所以普通中戶往往食客盈座予取予求而莫之靳迨至春耕時期借牛力貸籽種假食糧春付秋還緩急可恃甚或流民丐食初來則到處羅雀轉瞬則肇牽車牛固由於風俗敦厚亦儲積素裕者然也近五年來天災人禍靡歲不臻地力日竭收益日歛用途日多求過於供糧價昂貴生計艱難交際往來風俗日形澆薄環境所迫由來漸矣

三 社會交際酬酢習慣紀聞

按河套居民散漫向無旅邸千里過客非息裝於社區卽投轄於大戶鷄黍歡迎芻秣羅供懸榻待客截髮留賓西顧何憂東道可託良足感也他如逋客遊宦日暮途窮或則指困贈綿毫無吝色或則傾囊倒篋不待哀呼甚至年凶告賑效王倉出十萬之錢乞糴呼援學梁惠移兩河之粟會不少靳惜焉惟風氣儻閉禮節疏闊進退不嫻揖讓野人之禮貌亦恭投贈聊備棗脩鄉老之享儀必敬所謂禮失求野正謂此歟

四 婚嫁喪祭習慣紀聞

河套文化遲開禮典闕略嫁女必索重聘贏得兼金百鎰束帛盈筐娶妻敢望厚奩邀來何竇盈門邢譚滿座此婚嫁之特別習慣者也喪葬則練裳柳襯足以飾終祭祀則斗酒隻鷄無豐於昵此喪祭之尙近於古者也

五 衣食住習慣紀聞

河套漸染蒙俗服御由來簡陋衣則羊裘一襲足以御冬食則酸粥一甌足以永朝住則茅茨三弓足以容膝家無垣室無牖居然有夜不閉戶之風衣無表食無羹儼若守

太璞不完之素此衣食住只求需要不尙安適之習慣也

六 服飾習慣紀聞

按本地重女輕男積爲習尙床頭獅子坐也效七寶裝嚴其夫則形同奴隸坐上鳩盤尊恍被五雲裳帔其子則狀類乞兒而且押鳳堆螺得行人遮道爲幸品頭題足邀過客爭覩爲榮此又特別之習尙也

七 沿習蒙俗習慣紀聞

按河套屢經淪陷夷俗沿習習馬不察內外之辨不嚴下帷則娣姒同幙男女之嫌不避滅燭則主賓聯床而且男不諳重婚之條居然同心重綰帶女不知從一之義倏爾撒手上別船兄與弟竟稱隔山夫與婦儼如陌路跳神跳鬼舉國若狂打掛打蹤歷驗不爽居焉遊焉已成牢不可破之習夫誰糾之而誰正之

八 家庭教育狀況紀聞

按有子而養有子而教理也亦情也乃本地積習呱呱墜地竟忍棄嬰於平林莘莘舒

翹竟甘委子於牧豎當養不養當教不教此善士所以有育嬰堂之設官府所以有平民學校之組也

九 社會各種錮習紀聞

按地方錮習百年染之而有餘一旦革之而不足日言禁烟而滔滔者沉迷終夜日言禁賭而耽耽者竟坐場頭剪髮之令頻頒而豚尾披肩時慚面赧天足之會林立而鳳頭蹙步竟甘膝行此誠遷流不知所極者矣

十 祠祀習慣紀聞

按南人尚神北人亦崇信巫覡大仙廟望衡對宇坐享萬戶香花龍王祠畫棟雕楹歌祀千年俎豆至於迷信風水則拜迎土神醫治瘍瘡則延招喇嘛此又囿於地理而成爲習尙者矣

十一 沿襲文字名稱紀聞

按本地漢蒙雜處不通蒙文不能通商不諳蒙語不能租地而且兒戲官場竟有羊官

陞河縣志 卷中 三十三
車官夜官之名出人頭地羣上渠頭甲頭地頭之號遷就沿襲顛倒錯謬此則猝難變革者已

十二氣候方言服飾之特別紀聞

按河套地處邊荒氣候方言服飾與內地迥殊聽臘鼓而納稼幽風易圖佩艾符而披裘巖瀨徧地冬行夏令圍爐食七月之瓜炙手灼膚暖元續四時之火啾啾亂四聲正韻居亦胡亦越之間估徧雜五方元音在不蒙不漢之界男效女裝雞皮膚也衷紅甲中學西服羊肚巾爭纏白頭猶是樵子牧奴攘臂則釧鳴碧玉到處荊釵裙布過膝則帶垂茜羅此又習俗使然無足怪異者也

荒政紀略

自古備荒有政救荒無政周禮以荒政十有二聚萬民乃臨時補救之法非經常預備之策故倉人藏粟旅師聚粟遣人委積卽樹漢常平隋義倉宋社倉之先聲後世人廣土稀耕九餘三之制勢難復行漢代下巴蜀之粟移江陵唐人移西都之民食東都三代上謂爲變計三代下謂爲善政時勢之所趨雖聖哲不能不與時消息後套自民國以前地力沃肥民戶寂落一夫耕穫盈陌連阡萬室藏儲露積雲疊家給人足向不知有荒政之經書比年生齒日繁登收日歉悉索日敝儲蓄日竭一遇水旱之偏災每患補苴之乏術十八年之義賑各區義倉之設置因時可以制宜有備乃足無患荒政始有權輿焉特作荒政紀略

民國十七年秋大饑官紳組立賑務分會以賑之

按臨河向稱產糧之區比以近年兵燹匪禍水旱災侵紛至沓乘民間蓋藏蕩然一空兼以東路包薩武固東勝各地方赤地千里比歲比不登負襁担簷來臨就食者絡繹於道不下數萬口又兼回軍攻寧敗東駐距臨百里之大灘饑軍萬餘仰食臨境是時

外來饑民計有四萬口之多糧價騰湧昂於平時十倍設治局黃局長彥邦教育局王局長文墀公安局郝局長晉綱建設局楊局長春林財務局李局長增榮保衛團劉團總長義一區李區長元楨二區陳區長占財汪區長治泉三區傅區長正業四區楊區長鶴林商會張會長文煥于會長相龍董會長繼舒公同開會照章組立臨河賑務分會以黃局長爲主席分四股辦事以公安等局各局長各區區長商會會長爲常務員及各股股長紳學商農各界共捐賑糧一千五百餘石賑款五千餘元經各區實地調查饑民共計四萬一千餘口賑區共分五組城關爲一組四區各立一組自十七年十一月起至十八年五月底止賑期分八期每大口半月領糧九升小口半之其清查饑民辦法則以各區區長輪易之如以一區區長查二區二區查三區是也而徇情濫列之弊清其收發賑糧辦法必分派委員隨時抽查檢視也而攙雜雜質短少斤兩之弊清其情願回籍者酌量道路遠近人口多少量給糧米川資也而流離失所窮無所告之弊清是役也在事人員皆以民命爲要義本良心爲主張精乃心勤乃職不畏難不

辭勞不憚煩檢查必確鈎稽必嚴升合必較顆粒必惜澤必思普被惠必期均沾終其
事人無冒領數無浮收糧無濫發歷時六閱月濟民四萬口盡人無缺望比戶無浮言
考其成績惟三區傳區長爲最優彼以教會之觀念施慈善之手續尤能挈領提綱淪
肌浹髓其一二四區均能立起轍鮒望慰哀鴻正在辦賑時期趙匪大股兩次竄擾各
區饑民竟無一從匪者此可見辦賑認真能使各得其所之一證夫臨河一邊荒新建
之邑耳賑務大政官無成憲野無前例而官紳一體同德同心急起直追竟能始終貫
澈綱舉目張如此此可見爲政在人天下事之大可爲也後來者可以鑒已

十八年春二月綏遠賑務會分發賑糧賑衣到縣悉數支分之

按綏遠賑務總會分發賑糧三十四石賑衣八百餘件由包運局當卽支配散發呈
報

十八年九月設治局地方行政會議教育局長王文墀提議積穀設立義倉經全體通
過執行之

臨江縣志 卷中 二十七

按徵糧散賑爲臨時補苴之計可以救偏災而不足以備大荒周禮五黨相調及移民通財實爲救荒之本惜去古既遠其法不詳其次則積穀設倉漢唐下奉爲良法王局長有見於此特提議地方積穀辦法莫如建設義倉原議每種地一頃捐穀三斗以四千頃計應捐壹千貳百石分城關四區立五倉存儲規定倉穀管理保存收放及春借秋還章程與糧荒平糶糧竭賑放各細則以垂久遠而立經制案經全體通過於本年實行嗣經彭縣長及白縣長分飭各區察看情形設立義倉如此良法果能官紳慎選公正耆老負責經理可期百年無弊雖有災荒吾民可以無饑矣

農業林業紀略

河套以農立國農業擅西北之勝然地理未盡闢地力未盡開其於深耕易耨之常法一易再易之古制曾不少留意更何論新法詢以當地農業應如何改良均僑舌而莫能對所謂終身由之而不知其道者歟至於河套林業近年來戶口日增建築日多感於木材缺乏之困難又深知隙地之多沃壤之富水利之便驗人事察天時審地利無在不適宜於造林及詢其造林之本源及造林之作用則又各執一說各據一是余嘗延訪當地專心農林有學識兼有經驗之士與之往復討論特取其因地制宜規時定制簡而易從可坐言即可起行者莫如耿君房君兩說用特登諸簡端以爲先導後來者仿而行之引而長之卽糾而正之補而劑之均可以爲嚆矢焉特作農業林業紀略

臨河農業改進芻議

河套農業三世老農行不著習不察由之而不能知外來僑客無經驗無比較知之而不能言言之而不能切此所以企圖農業者亟欲延訪周諮而求得要領也耿君德忱

以魯北雋才擅長科學尤究心農林樹藝實業來套領墾經營規畫皆有心得本諸實地之試驗加以精密之研求參以往復之駁辯罔不持之有故言之成理矣客有問於耿君曰河套沃壤千里地利占勝農業應蒸蒸日上矣乃何以地不加闢也民不加富也粟米不加多也子能得其受病之處而治之乎耿君愀然曰吾知之吾不敢盡言之寧使言之而不用不忍用之而不言其一曰排除障礙河套農業以水利爲根本各渠灌田除二三道真正農民自開之渠能水利公沾外其餘官渠商渠管理者既形格而勢禁主持者又假公以濟私甲地則萬流分潤乙地則一勺未輸甚或自封自啓曲防屯膏坐令旁決旁流以鄰爲壑利民其名厲民其實農業尙可問乎擬請仿行前達局王局長建議水利歸地方官承辦以每年澆田之多寡等其殿最嚴定賞罰責專情親費省勢便有百利無一害便國便民便地方特不便於贅瘤機關駢枝用款耳倘能仿行事權既一責成亦專水利日宏農業未有不日進者何障礙之有其二曰化除意見天下事自用則敗自專則錮閉關自守齷齪曰此我之殖民地未有不立蹟者近年齊

魯燕豫之士鑒於內地人滿爲患更兼軍興未息實業墮落不得不另有企圖往往携絕大資本負耒遊套受廛領地此輩知識階級人士甚願與當地勞力界交換智識爲精神上之輔助指導工作爲資力上之餉遺河套爲中國之領土卽爲全國人民之公產與其故分畛域終讓後來之居上何如不分町畦同享無量之利益主伯亞旅吾同胞也比閭里鄰吾同體也通工易事併力合作農業焉有不一日千里耶其三曰分辨土宜臨河地質曰黃膠土曰黑土曰沙土黑土沙土宜麥黃膠土宜豆蓋麥性喜鬆和豆性耐長養地氣有剛柔穀性之資生隨地質爲發育然黃膠土雖膠滯任令載芟而載柞以化其結深耕深耰以通其脈並非不適宜種麥此人工可化地質之證也獨怪套農坐貪天功不盡人力動謂生地易於種植遂厭薄熟地竟有舍其買地另包生地者惰農苟安抑何可笑殊不思周官制地法不易之地家百畝一易之地家二百畝再易之地家三百但使更番休息地力卽互爲週環又何生熟之分焉其四曰改良農器河套農器窳劣其最須要者曰犁曰鋤曰鏟本地之鋤尙可應用惟犁式過仄且直耕

臨江縣志 卷中 三十九

時用力多而鑿地窄莫如改寬至五六寸成側面形省力既多闢地又寬便何如之又
鏤腰太仄鏤鑿太輕仄則開隴亦仄不惟不能芟草抑且不能生苗太輕則播種不易
深入費籽既多出苗亦不勻故加寬加重以劑其平而適於用其五曰改用肥料周官
草人掌土化之法以物地相其宜爲之種驛剛用牛等法固不必拘泥仿行然河套牧
廠林立牛羊馬駝之糞就近輦運不竭化無用爲有用能令地移其氣礮變爲肥樹植
罔不蕃滋此又贊助地力之一法也其五曰捍禦水災從來大利所在卽大害所在善
治水則有水利無水患不善治水則有水利亦有水患擬仿周官稻人遺治以瀦止水
以防止水以備乾涸以溝蕩水以遂均水以資流通以列舍水以澮瀉水以防泛溢與
水利爲節宜爲水利設保障農夫所以無恐歲事所以屢豐也至於防旱防潦防蟲防
霉防霧防黃黑丹諸法可參照中外各法農業之發展可翹企而俟之矣

關於臨河急需造林之管見

民國十九年春四月房君魯泉呈准縣政府領官荒地二十五畝於城北試辦苗圃以

爲企圖林業者倡甚盛事也客有前席致請者曰子來臨有年矣日日言林業口講之指畫之早興夜思無少息究竟驗諸過去考諸現在預察將來子果能發展林業而貫徹其主張乎抑試可乃已需以歲月以待其成也房君瞿然曰旨哉齊人之言雖有智慧不如乘勢雖有鐵基不如待時我臨河隙地如是之多地質如是之沃水利如是其互貫交注而又歷嘗材木缺乏之痛苦確見造林之實效當是時也勢有可乘時不能待有導斯從有響斯應林業之興其在斯乎其在斯乎今將臨河森林興廢之沿革及將來發展之利益詳述之以餉同志焉一曰臨河林業阻滯之原因查臨河田地分墾地外墾地兩宗外墾地大戶包自蒙族轉而分租各花戶人無地權誰肯植樹墾地領自大戶第規目前之利不作百年之圖況地隨水走人隨地走人無定居民鮮世業各租戶春去秋還更無植樹觀念此其一因近年蒙族多數放墾人口漸次增加對於森林有無之利害人漸覺悟惟後套故習每年白露以後牲畜滿灘滿谷踐踏樹木蹂躪秧苗恬不爲怪口頭誥諭正式交涉均置諸不理故植樹者保管無法人多氣沮此其

二因三曰臨河造林之利益套中向來需用木材全恃西來筏船輸入接濟近年來河路常梗又兼西來木植有減無增甚至拱把之木貴逾拱璧經寸之材珍如寸珠萬厦廣建尋巖搜材百堵日興停工待料良足太息設能迎機植樹以地十畝計可植樹兩千四百株十年成材每株最低以價洋兩元計可收四千餘元之利益除臨時保管及常年培養費至可少可獲三千元之利益較之種穀之利可加五倍雇或者曰人人植樹處處植樹得毋價值低落無利可言歟不知此後戶口日增建築日多製造日廣十年之中仍是求過與供斷不至供過於求證之奉吉熱河森林彌漫山谷而水陸絡運不絕於道其價有日增無日減可爲明證二曰造林保管有法本境試辦林業預防牲畜踐損必須繚以三尺高之矮垣垣外護以三尺深之濠凡民堡村鎮街舍傍均限令植樹若干嚴定保管責罰章程責成村閭長完全負責以植樹多寡及保全損失樹木多寡爲考績之殿最凡故意損失樹木者按現時價值加十倍罰賠村閭長亦嚴重處分之事當創始懲一警百絲毫不容假借法立必從令出必行乃克有濟四曰保護苗

圃以資倡導苗圃爲森林之母他日千百森林皆由此苗圃所孕育先立一苗圃以爲標本然後每區須立一二所凡苗圃購籽取秧力所不能及者官紳應輔助之放水澆水勢所亟需要者水利社應維持之強梁掠取人畜侵害官府應嚴制之迨至樹秧長成也酌中定價分發各區村既盡特別之義務應予相當之權利吾意取不盡用不竭可以製造無量數之森林不出三年綠蔭參天碧雲匝地林業未有不日新者也五曰收林業間接之利(甲)固堤防凡渠岸有樹之處根柢盤固永無冲刷之虞利一(乙)調氣候河套寒燠不時氣候失調森林多則吸收風沙消納烈燄天氣適中利二(丙)防旱災森林繁茂足以納炭氣吐吸養氣雨澤自多利三(丁)活地脈地中水脈往往聚於樹根古人傍樹鑿井可爲明證利四(戊)增燃料套地煤礦未興燃料支絀萬分森林矗立則繁條支柯材不可勝用萬戶炊烟不至中斷利五近數月來地商大戶及有志士民踴躍爭先分秧購種實行造林者接踵而起統計此最短期間臨河新增樹株已不下二三十萬是亦林業前途大好現象也魯泉不敏願與地方人士共圖之

全境蒙旂界址戶口生計保衛禮俗召廟紀略

恢復久淪之疆域開闢重新之版圖漢唐故址遠而難稽蒙旂舊封近而有據所以有清建置廳縣均以旂界爲界論畫地之由來則旂爲經而縣爲緯論治邊之大略則縣爲經而旂爲緯方今五族共和漢蒙一家鷄犬相聞聲教相暨將欲躋同軌同文同倫之盛而進於無猜無詐無虞之休必辦其疆索之廣狹計其戶口之登耗察其生計之盈虛觀其保衛之強弱察其風俗之純漓紀其宗教之盛衰然後可以爲行政施教立養敦化一道同風之張本焉作蒙旂界址戶口生計保衛禮俗召廟紀略

(甲)全境蒙旂之地界 按本境蒙地分四旂曰烏拉特前旂卽西公旂烏拉中旂卽東公

旂曰杭錦旂曰達拉旂烏拉前中旂地套搭廻環向未分界由五加河北岸起東至義和久西至阿拉善王旂東界止東南至達拉旂地北界西南至杭錦旂地北界地約四千餘頃達拉旂地自公益恒起北至五加河南岸南至公中廟西至大發公南白淖包東至剛濟渠西岸地約五千餘頃杭錦旂地東至剛濟渠西至烏拉旂地南至大河南

岸北至古新廟灘地約六千餘頃

(乙)全境蒙民之戶口 按杭錦旂理民官府一曰中巴噶大臣名八圖布浪的所屬蒙民

一百二十戶男口五百五十名女口五百餘名計一千餘口一曰西八巴噶大臣名八

達葛代所屬蒙民二百一十餘戶男口九百十三名女口八百二十名計一千七百餘

烏拉前中旂地均坐最大陰山前麓勢如弧角形蒙民寥寥共計不過二三十戶男女

丁口不過百人達拉旂理民官府曰西召朋桃賴梅令所屬蒙民百餘戶男五百口女

四百餘口約計九百餘口

(丙)全境蒙民之生計 按達拉旂蒙民戶口地不分男女每口發給地兩頃杭錦旂蒙民

戶口地向以個人勢力之大小爲受地多少之標準既不能計口授地卽不能稱物平

施有力者坐享膏腴無力者貧無立錫立法不良是亦專制流毒之一班已烏拉前旂

蒙民戶口地計二百五十頃中旂地報墾尙未收界並未劃定戶口地數俟再詳考至

牧畜乃蒙人天賦自然利權無論何戶未有不養牛羊者惜各旂理民官府不能提倡

勸導因其所利而利之故各戶牲畜數目素無精密之統計明晰之比較徒恃我方面比戶調查彼蒙民各懷疑慮其牲畜狀況數目知之不言言之不盡總之全境蒙民畜羊不下萬隻畜牛不下二三千頭蒙人食料取材牛羊居多此外日用簡陋無他耗費故目前景象官府雖不能代謀其生蒙民尙能自謀其生也

(丁)全境蒙旗之保衛 按各旗保衛均設有遊擊隊烏拉前旗游擊隊五十名以小梅噶克加拉長之中旗游擊隊五十名以阿拉布長之杭錦旗兩巴噶所屬游擊隊共二百名以八圖布浪的與八達葛代分長之達拉旗游擊隊四十餘名以朋桃賴梅令長之查各游擊隊性質以安輯地方保護蒙民爲宗旨同是國土同是國民自當無分畛域捍衛地方臨河十五年匪燄日張杭錦旗游擊隊竟能協助警團奮身爭先合力剿匪具見深明大義地方紳董莫不欽佩嗣後數年遇有寇警均能聯絡一氣頗資倚畀各旗如果仿此行之何慮地方之不靖耶

(戊)全境蒙旗之禮俗 按蒙人階級分三種曰台吉曰喇嘛曰黑人黑人服役貴族者曰

奴才服務召廟者曰黑徒蒙人中黑人最賤最苦即其婦女子弟均爲貴族之奴才性
堅樸有毅力能履險耐勞惟服從是其特性視官府如神聖見官則屈足典禮則膝行
習與性成由來久已近日狡詐侈驕無復從前樸厚風氣所趨者然也其王公服飾仍
尙舊制袍褂頂戴相沿勿替平民則純尙布服寬領大袖繫以佩帶重重暑日赤足冬
襲老羊皮裘不裝面男子尙拖髮辮達旂風氣開通近年頗有剪髮者亦吉光片羽也
女子袖闊衣寬裙長拖地珮環簪瑱極紛沓重且笨喜塗飾堆螺描黛以爲工處女未
嫁則編辮旣嫁則結髻髻用膠刷光可鑑人髻不恒束因束一次須膠一次也飲食以
乳食爲上肉食次之乳品中取鮮牛奶以鹽類和之以茶調之曰奶子茶以作奶豆腐
之漿覆之俟其醱酪久復蒸於鐵釜塗以牛糞使閉其氣味蒸氣自在流出卽爲酒曰
奶子酒又以新奶和水俟其醱酪帶酸味名曰酸奶子爲蒙人飲料中美品能却暑解
渴取新奶置盎中稍靜油上浮濾以絹布使淨徐煎之結如金黃色如蠟色味遠過舶
來品宴貴客餽至友始將之名曰黃油此外製奶豆腐製牛酪以水化以火化無非以

氣化其製炒米其法不外曰乾曰淨曰透故能咀嚼彌甘行商行軍視爲適用之糗餌
王公均有府宅普通蒙人均在蒙古包間有土屋名曰板身然院內仍置包示不忘本
也包製取圓形皆面南上架爲梁若張傘蓋然寬深十尺至十五尺週圍圍以氈數層
束以毛繩門高三尺五寸寬二尺餘男女分左右居其中間設佛龕家主位龕前有宅
中居正之象焉有客投止未入包先投鞭於地然後入趨左主人以爲知禮款以酒漿
若再通蒙語益足結主人歡招待禮節送哈達換烟壺客如式敬答之蒙俗詳於上下
略於內外男女之嫌不知避忌平時嬉笑戲謔履交錯恬不爲怪甚至兄妻其姒弟
妻其嫂者時所恒有故無孤憤之男無終寡之女惟婦人再醮必歸母家夫家聽之婚
姻不計門第不問行輩不問名不納采以家之貧富定聘資牛馬之多寡婚時居然行
親迎禮男子腰弓矢乘駿馬往迎之女子紅巾覆額乘駟馬偕婿歸登堂不交拜入幃
不合盞新婦飯後粧飾出堂與戚友爲禮送哈達烟袋均如儀若喪葬有力者延喇嘛
誦經以火化屍囊骨送五台山貧者禮懺後投屍於野三日往視若爲禽獸攫食則狂

喜否則家人戚戚悲平日日用極簡單男子出外牧畜遇天變女子趨而助之歸夫供力作女治家事女紅不甚留意獨於榨乳諸事爲全責娛樂以跑馬爲首務無老無少無貴無賤均善乘控馭有法又善角力決鬥比賽身命不顧惜有羅馬人風氣殆半由天賦半由人事歟

(已)全境蒙古召廟之設置 按蒙古大召多係奉勅建修小召係由蒙人捐置大召膳召地三方里小召膳召地半之烏拉前旂地一曰狼山畔地方別拉圖廟活佛二尊一曰口口淖地方推末廟烏拉中旂一曰五善地方察汗高廟二曰三拐後口子地方五郎托拉蓋廟三曰狼山灣地方東修廟四曰三淖西北山裏孛拉廟五曰太陽廟六曰後山畔地方陰山代廟活佛二尊杭錦旂一曰千友廟漢名廣堂寺活佛二尊二曰梅林廟活佛一尊三曰加東巴廟活佛一尊四曰素拉各廟活佛二尊五曰樹爾台六曰章嘉廟七曰察汗淖廟達拉旂一曰班禪召二曰善達公廟漢名宣化寺活佛一尊三曰古新廟漢名樹拉台廟考蒙古崇信神佛發源於漢盛行於唐喇嘛分紅二教紅教爲

寧夏巴派准肉食娶妻能俸墨經咒人死黃教爲隲達謨派起於宋仁宗時自元世祖利用宗教以羈縻強蒙有清仍行之而亦效凡爲喇嘛者輕其差徭故每家三丁必有一二人充喇嘛又有所謂呼圖克圖稱曰活佛蒙民奉爲上帝天神不可侵犯尤可笑者聚石爲堆名曰鄂博春秋致祭必敬必誠迷信愈深對於生計愈不知過問無論其他就後套二十年前蒙民戶口比較現在當不止減少十倍應如何灌輸文化破除錮習使其從事墾植牧畜導以同種同族之義養其沈毅慄悍之氣斯人人皆袍澤人人皆干城以固吾圉以張吾威有餘矣特推論及之以俟夫有政柄者鑒焉

臨河設治局蕭局長振瀛事略

蕭局長振瀛字仙閣吉林依蘭人少秉異才抱不世之志尙肝膽與人無町畦無城府見義勇爲不知工趨避計禍福以是鄉國咸推重之民國初造奔走國事爲異已者所嫉幾瀕於危十四年來綏上游一見卽目爲國士倚如左右手是年秋委充臨河設治局長臨河初分治爲綏西巖疆北通庫俄西扼甘新襟山帶河天然形勝爲國防計爲省防計非有長駕遠馭之才不足立長治久安之計 公下車伊始獨任艱鉅首先延攬人才凡地方紳士公忠貞亮及有一材一長者罔不優異而特起之尤復廣詢周諮考察地方之政治實業經過之成迹與現在之情狀以爲創設張本於是披棘芟荊宅中正位爲之區畫疆理奠定城社建築市廛創設校舍謀必協衆事必躬親舉措必合人情取舍必衷輿論邑之人見其平民以出治也富者輸其財貧者効其力智者貢其謀巧者獻其藝奔走偕來羣起而聽官府之指揮公乃沐雨櫛風早作夜思所以獎勞撫慰之者無弗至故凡百建設工無曠料無廢欸無糜事無墮民無後言士無非議在事者無惰色無媮容不罰而人自畏不賞而人自勸不三

月而大工告成 公誠所謂善於用衆者哉 公之馭衆也如執六轡御羣馬而一塵不驚
公之立政也如以快刀斬亂絲而百結立解 公之執法也如然通犀照鬼物而羣陰惴伏
如縱鷹鷂擊梟鴟而禽薙無遺且也時值軍事交棘臨河當甘綏孔道悉索敝賦急於星火
公以隻身支柱之他人瞠目咋舌皆望望然去 公獨如持危舵於驚濤駭浪之中而穩渡
重洋如扛九鼎於金戈鐵馬之場而平貼委地 公眞所謂智周萬物力包萬象者歟惜任
事未久奉檄東調不得竟其所施邑人憩遊棠蔭嘖嘖頌神君不置古人所謂孰殺孰嗣庶
幾近之矣

臨河設治局呂局長咸事略

士君子經世之學爲其大者遠者而已至錢穀簿書之瑣瑣分其餘力舉而措之也有餘若呂公咸之治臨河此道得矣呂公河北涿鹿人名咸字著青幼聰穎束髮受書日十行俱下父老目爲大器早年蜚聲校黌績學篤行天性孝友與人交重然諾有肝膽壯歲關心國事服務外部熟習中外國際情狀十六年充綏西水利總辦嗣又兼任臨河上游殆以公將大有爲特畀以兼職使之爲所得爲歟公感逾分之知抵臨後勤求民隱務在解除煩苛以與民休息境內駐軍複雜供億無算公齟齬力爭約定額制額外莖草顆粟不住強索民稱便之先是臨河城工築未半而止石海之變憑陵闌入士民遂注重城防公堅持修城之議屬紳商分董其事公日夜督巡無少息三閱月而工告成是役也支款一萬八千有奇於地方公益費內撙節用攤派并未加重民不勞財不傷可謂善於得民已先是縣西境舊有黃土拉垓河渠創於河曲楊氏尋就湮庚子教案達旂失和外人以該渠地賠教條件異常苛虐爲我北方外交史最痛心之事近年河套教務澎漲全賴該渠地利益操縱我

民衆官廳無如之何也十七年北伐成功不平等條約逐次刪除 公因利乘便擬收回黃
土拉垓河教堂渠地上書反復陳請 上峯壯之一以任之 公正式組成委員會遴任熟
悉外情聲望素孚者佐之時有王君文墀李君增榮楊君春林子君相龍君全貴石君以驥
爲秘書爲委員爲接受員曾以書面邀該教士等到會該教士延稽爽約不得已請以無條
件收回呈上報可派員接收計渠長一百二十里地一千零八十頃一旦收歸國有光我故
物還我主權張我國體樹大河以北外交勝利之先聲是役也排衆議破羣疑嶽嶽獨行俾
貫徹始終之王張何啻以暮鼓晨鐘喚醒我北方二十年外交之迷夢也厥功亦偉矣哉至
於提倡文化促成民治善政書不勝書去後留思至今嘖嘖頌不絕於口焉亦足以風已

臨河設治局王局長績世事略

王氏爲太原望族明德之後代有達人兩千年來世德懋蒸其人多易直溫良達則爲一國循吏窮則爲一鄉善士前後輝映若合符節吾於雁代間得一君子人焉曰績世王先生

先生天性敦厚篤內行幼與羣兒遊抑然自下有一視同仁之意泊少長周旋族黨以忠爲體以恕爲用初不知人間有機巧變詐事亦從未見其與人爭得失較短長其善氣迎人雖獷夫悍卒亦爲之氣折至誠動物者然也 先生厭棄帖括業於中外古今經世書能得其綱要清末季考入晉省優級師範學校以優等畢業嗣屏去一切專心實業遊歷綏區將欲展其大西北之志而得所藉手也至薩縣爲同人挽留辦學手創學校數區成績昭著迄今人才蔚起多出其門民國初元來套試辦牧畜墾植時以地方多故未竟其志十四年臨河分治出鉅貲建市廛連楹高棟數十架以提倡商業時值地方初創臨紳留 先生襄助地方大計十五年國民軍全部駐套臨河當孔道駐軍複雜匪氛日惡烽燧亘宵不少息征索日亟七月後勢益焚如紳董先後相引避莫可蹤跡 先生不得已獨留支危局時有于董

事相龍爲 先生左右臂不匝月于以病辭 先生屹屹獨立遇有征索差徭以一身承應之飛書告糴和淚和血而言乞粟餉軍傾箱傾囊而至戈矛列前斧鉞脅後 先生自若也百口喧呶千騎驕嘶 先生自若也力能致者支配而予之力不能致者溫語以却之開誠心布道直令威不忍劫力不忍奪巧不忍篡出萬死一生於金戈鐵馬間亦岌岌危矣如是者五閱月迄不少息十六年一月城陷縣署殘破一空各職員裸體瑟縮 先生傾篋衣之傾甌食之人栩栩然有生氣焉時縣政失綱都人士羣推 先生暫主縣政駐軍長官請於當道報可先生掃除灰燼撫恤瘡痍宵旰勤勞日不暇給維持地方可告無愧已乃或有竊議 先生戀戀不去也得勿有利之見存歟噫爲是說者殆未度當日之情勢貿貿然出此責人無已之譎言也試問烽鏑徧地礮火連天大多數商民舉拋棄其產業入山唯恐不深初未聞別有一人焉冒大險蒙大難犧牲其可貴之生命希圖其不可知之利者 先生卽爲利留亦以其生命換得其有造於全局爲不少矣以視掉頭不顧視地方無關痛癢者已加乎其上也乎出入分明事事公開更無利之可言求全之毀何足當識者一笑耶總之

先生對地方不惜出全力以持之者亦行其心之所安而已亦無所爲而爲之而已 先生
何所容心哉特表而出之以待知人論世之君子

國朝憲法... 凡我士民... 宜各遵守... 毋違... 欽此

臨河縣彭縣長繼先事略

邊吏之難得也自古爲然矣不惟疲癯鬪茸之吏試之輒躓卽反其道獎進武勇梟將債帥曾不知經邊安民爲何事小則浮動而召侮大則債事而喪權吾未見其有濟也臨河爲包綏屏障蒙漢雜處號稱難治太原軍府惓惓西顧亟思得人而理之特任彭參議繼先來宰是邑公蒞任卽以刷新政治洞達民隱爲先務凡前任議決未行之件如設義倉立村制築民堡清查戶口槍械厲行清鄉諸大端均次第實行事無不舉才無不庸復呈准改升縣治縣署組織如制尤復注重交通籌設長途電話督飭區村修官道十段以期通行其弭盜要著全在整理團政使家自爲衛人自爲戰壁壘改觀旂旂變色伏莽潛消宵小遁迹終其任并未發生一盜案此無他人人有自衛之能力戶戶有自衛之精神環境所迫時與事會而已在任五月旋調充察省市公安局長士民籲留不報識者惜其抱大爲有之志而席未暇暖奉調他任未竟所施也然卽此舉舉大者在公已啟其緒後來者引而伸之恢而張之可也此則邑之人企祝者已

何止此而已之入金地答曰

剛到奉臨時并未遠祖直進幾朝此舉學大各亦分日想其後於來春時而外之對而親之
而曰亦丑其且誠歸汝察市公交試其士以齋宿不辯歸香哥其餅大食皆之志而漸未
計科未齊坐一盜案此無動人人自自謂之謂其曰曰首自謂之辭慨然其恨也則與事會
聚書全至盤照閣刻動察自為備人自欲彈壓也雖其變也外奉督所責小惡惡其
前總署照歸暇時其重交無繼結其發置諸皆謂固林謝首銀十銀以取便行其財益
案因變而香曰口會漸飄行商漸滿大歸自來策實行事無不舉之無不潔淨是而為代親
卒量品公薛升朝以應海苑帝師致以歸從伏器且前升薪火未行之昔或如蓬查立林歸
蘇根朝家斯漸與歸繼繼節 太原軍州對對西運運思若人而應之科升運案歸歸夫來
曾小眼歸歸受其氣何得不明等處而科對大眼漸畢而爽無吾未見其音衛出細何欲曰
幾更之難計也自古為幾矣不辭逐逐開其之更歸之神開明及其真與幾近更泉幾對明

細何細細細其歸夫率細

臨河縣白縣長保莊事略

民國十九年四月彭縣長繼先奉調察省要職綏政府注重邊要特簡白公保莊接臨篆白公秉性敦厚天質聰彊有幹才久爲上游器重蒞臨伊始痛念地方迭經浩劫民生日望蘇息首在解除煩苛以紓民生時語人曰爲治之道革弊爲先興利次之况弊除利亦俱興凡遇有不便於民者悉予革除而減輕之民咸稱便可謂善於得民矣其整頓教育也臨邑學校師資缺乏人才闕塞爰由綏延聘學術優長人員分任管理教授學風蒸蒸日上每區設模範小校一所學額限六十名爲準遴有學識有經驗者治之成效日進各教堂學校編制課程多違制乃就附近地方設模範校一所以資觀感并召集各教士暨民中有資望者特開教育改進會議定各堂小校一律改爲私立悉照章編制至如增設鄉村小學以期普及籌撥升學津貼以資策勵又其範圍不過者已其改良司法也凡準傳之案勿牽累勿稽延均隨到隨訊隨訊隨結必令獄無滯囚案無留牘而始快又復分民刑分男女分監所既免雜居釀變又免時疫傳染至如考選法警以清流品改建法庭以示威嚴又其纖細無遺者

已其規定鄉團也每區編定常備保衛三十名區長負責教練經費列入預算并令每村送有身家之壯丁五名由區送縣訓練兩月發區再行抽送週而復始農皆爲兵何難自爲守戰再蒙旂游擊隊向來衛護地方頗資得力彭前任已委各旂士官爲一二三隊長公尤優待各隊長復加達爾計爲游擊總隊長并予以圖記以爲信守五月間楊匪擾臨該隊助剿尤力此其一證不第此也後套大患莫大於蒙旂搆亂二年外蒙內犯民衆至今猶爲寒心本年五月中風聞赤俄侵略外蒙煽惑漸及內蒙鶴淚風聲人民惶恐公不惜重貲厚備多儀派商會于會長馳赴東達公旂接洽以覘意嚮該旂主巴保多爾濟派員來臨報禮表示本旂素明大義決不附和内蒙尤望時加臂助共維國艱云云從此信使往還儼然一家邊防可望永固焉此信孚外交者一本縣城垣迭被水患特派魏紳三槐王紳侶監修城工并將附城護城壩加高培厚永杜水患民堡足禦外侮後套尤有明徵惟民情憚於創始實行爲難爰令各村限期趕築秋後報竣以固冬防此注重防務者二按軍隊住居民宅軍民交感不便特開地方會議決定修復縣府西院安設旋部又於東關相度地勢創修大規模

之營房刻已開始工作指日可告成功此奠厥民居者三按本縣地面遼廓防務商業消息端在靈通公本彭前任規定商辦電話當以太安鎮地近狼山爲內外蒙通商孔道又係商業繁盛巨鎮先設臨陝電話然後依次建設四區如在一堂已本境渠道縱橫伏秋上水交通輒梗慮其襄涉之多苦也特修徒杠輿梁以濟之慮夫窮途之中阻也重築經路緯路以便之此發展交通者四此外勸募設立銀號以劑金融提倡舉辦車捐以輕徭役規定路綫傳遞公文以期迅利所謂平民出治無時不從民情著想無事不以民事爲先傳曰樂只君子民之父母此道得也紀之以爲留心吏治者勛焉

此處為多欄空白表格，每欄由一條垂直線分隔。表格內無文字。

臨河第一區李區長增榮事略

李區長增榮字仁甫河北棗強人其封翁樂山公秉性剛毅有奇氣蚤歲長技擊捍衛鄉里人莫敢侮壯年從事家人生產光緒初元來套治農業執事專而有恒與人忠而有信各大地主優異逾常格是以田產日豐家道日盛卜居五原西區強油坊南偏德和泉乃其地商之名號如王氏之同興東是也封翁尙風義重道德好善如飢渴嫉惡如探湯惟視衆生如平等恤困扶危推食解衣無吝色有善人之目語云積善餘慶有由來已生丈夫子二仁甫區長能承其志繼其業性孝友篤內行與人推誠布公渾無涯涘無智愚賢否日在其包羅中而不自知馭事有幹濟才任紛錯危疑之交乘隨機以應之均能秩然理帖然平後套以水利爲命脉民國初元渠堙田蕪公慨然動殖我民族之志爰約同田君全貴趙君海共投重貲重濬蘭鎖渠開闢三大股新渠早作夜思渺慮澄心測勘規劃冒風雪犯寒暑日夜督治渠干食不甘寢不安偶有挫折而再仆再起其志不稍挫氣不稍摧卒底於成渠長八十餘里寬七八丈每年澆田七八百頃食其利者千餘家豈第爲一人一身計哉地方之樂利

夫豈有涖涯耶六年春盧匪在武川就撫來套編制全部萬餘人複雜無紀假徵糧四出騷擾居民皇皇懼紳董相率引避公關念大局不忍言去傾廩倒倉盡出歷年儲積以餉飢軍時閱五月耗糧兩千餘石當日窮檐葺屋得以稍留斗勺餘粒藉以苟延殘喘者全賴公傾倒不吝獨以大力幹旋之也古人所謂毀家紓難公詢無愧矣十四年臨河設治任公爲一區區董建置經始賴公贊助之力居多十五年軍事倥偬征億奇重公因應無方不窮於用十八年本境糧荒儲藏殆盡東路各縣比歲告災難民來臨就食者四萬餘丁口縣府奉令辦賑公首先慨認捐糧二百石以爲之倡衆大戶聞聲響應不崇朝募糧一千餘石欸五六千元事得以濟借非公登高一呼義聲首倡安能應如桴鼓實惠均霑如此也本區賑務悉心策畫實力進行事竣無一缺望無一後言可謂稱物平施功歸實濟者矣公長君元楨字幹丞儀容脩偉才具練達父老推重僉謂雛鳳鳴盛當清於老鳳也德門獲福克昌厥後其信然歟

臨河二區陳區長占財事略
茂林

張弛消息而天道亨剛柔交濟而人事成一身然一家然推之一區行政之道何獨不然吾於二區陳汪兩區長而歎其相資爲用亦相得益彰也陳區長占財字聚民天質穎異髫年就讀目過成誦有神童之目惜早歲失學族黨以爲憾事臨河二區田地荒蕪民戶寥落在勢不能獨立然爲行政區域計又不能不分治陳區長承凋敝之日撫貧瘠之區又值駐軍複雜供億煩苛亘天烽火徧地荆榛爲區長者以獨力支柱威無所施智無所用惟有不辭勞不避怨不憚煩不苟安雖鋒刃加頸槍彈次胸亦能聲色不動進退裕如寧任屈己以求全決不肯輕率以激變卒令難關勉度危局得全天下能忍辱者能負重老氏以柔道勝人陳區長庶幾近之矣雖然有弛必有張者天之道也有柔必有剛者人之道也天道不能常弛人道不能偏柔繼陳區長而起者有汪區長區長名茂林字治泉南徐人其先德於咸同年隨軍征回凱旋道經河套留居經營農業遂家焉區長少聰疆家貧失學生平留心世故於人情物理洞鑑無遁影與人接物和而介寬而有制任事能當機立斷無依回無阿徇平

臨河三區傳區長正業事略

自古一鄉善士不必有赫赫之功奕奕之名但令口無過言身無過行卽足楷模鄉黨地方無事斤斤勉爲束修自好一旦有變則必本同憂共患之誼亟起爲披髮纓冠之救其衛顧桑梓深切獨至有過於齷齪吏萬萬者於何徵之徵之傳區長正業而得之已傳區長府谷人田山其字其先德以醫術名於世正業能大其傳女科尤得秘鑰手術接青主元鑑而盡其變足跡所至踵門請望塵拜者不絕於道先生則無親疎無貧富無貴賤概予施診罔不應手奏效初未嘗受寸縑叨杯酒焉謂可謂普濟宏施者己先生性豁達休休有大度持家儉奉已約一粥一飯珍惜無弗至獨至慈善事業雖傾倉倒篋不少吝居恒嘗曰人世階級境遇吾視之皆軀殼外事惟同此血氣同此心知衆生皆吾平等吾能膜外置之耶計其生平義行善舉任恤睦婣美不勝書獨至十七年辦賑一節尤其卓卓大者溯自十四年臨河分治大兵大役水旱偏災靡歲不有民間糧儲搜括殆盡十七年秋成僅告下稔冬季糧根奇荒又值東路饑民來臨就食者不絕於道十八年斗米萬錢外來及本境饑民調查共計

四萬丁口三區居其半數哀鴻徧野勢汹汹不可遏先生當夏田初登先期密約各大戶爲預防劫奪禾稼計多留滯穗以贍餉之或另指熟禾數畝以分惠之慮其錯處無紀也另編一組以部勒之慮其舊業之坐廢也酌發糧欸以助之歸耕護以團隊以導之出境此皆賑濟常例之外所以曲成之者且無不至也至其承辦賑務抽查戶口毋冒毋濫監督散放毋漏毋徇所以綜覈之者洵可謂功歸實濟者已是役也論事實惟三區最難論成績惟三區最優嗟乎自古備荒有策救荒無策自周官散佚三代下久不知荒政爲何事先事漫無預備臨事竭蹶補苴卽補苴得法生民之元氣已傷况舉動一涉張皇章制卽滋紛擾數萬涸鮒不入枯魚之市也幾何矣若傳區長者可謂以不忍人之心行不忍人之政者矣十九年甯夏楊某由中衛於六月十九日揭竿倡亂聚衆至千餘人東犯各城邑勢如破竹及入臨境劫掠三區諸村堡人一夕數驚時先生解區長任家居聞變攘臂奮起號召全區保衛團及各大戶自衛之丁壯得勇士百餘人復糾合杭旂游擊隊遙爲呼應於是激昂誓衆士氣百倍乃爲設間用伏用蹙匪隊於黃土拉垓河各支渠支渠套搭紛歧匪騎陷泥淖迷途不

得出我軍合圍大進批元搗虛疾如風雨匪四潰如鳥獸散迅逐至剛濟渠日已昏未便窮
追凱旋日邑人士歌頌盈路 縣府列其功上聞請優叙焉

Blank columns for text.

... 剛濟果曰曰香未...

臨河四區楊區董茂林區長

春林
鶴林

事略

取甌脫久曠之地以獨力闢之化磽爲肥化瘠爲沃取堙圯不治之渠以獨力濬之易塞而通易窒而暢地加闢民加衆戶口加多租稅加增一家之賜千家食德一姓之功百姓樂利此何怪衆口交推舉全區之政付之於一門而奔走聽命焉如臨河四區楊區董茂林及若弟春林鶴林兩區長洵可謂造福地方後先濟美已攷楊氏系出河曲世傳山後楊氏自宋代以武功起家名滿海內代有達人清同治之季其先德玉珍公偕弟玉璽來套治農業家於永濟渠側覃心水利從濬川王氏游能得其秘家日起子姓日繁兄弟有丈夫子九人均英英露爽茂林春林鶴林尤能繼承其業矯矯傑出者也茂林爲羣季長天性敦篤內行實踐能以身作則一門孝友里黨欽矚河套言家教者首推楊氏其處衆和而不流其應事公而有制其爲五原西區董事也課農林講牧畜興教育時值盧占魁之變供億煩苛凡有征求盡出其所有以應急以紓民力民國初元包租永濟渠經營擘畫水利大治六年改租他姓坐廢半途氣頓沮是時也春鶴兩弟進曰我兄弟以殖民爲志當求其大者遠者欲獨立

一幟莫如以全力開闢楊家河子可謀百世利毋寧俯首倚官府爲生活茂林蹙然曰楊家河工大費鉅恐非我兄弟所能任春林鶴林曰吾輩作事所憑者信用所恃者精神愚公移山精衛銜石同心自克濟有志事竟成何自餒爲於是茂林奮袂起偕同春鶴兩弟計劃全局悉心測勘虛衷延訪參合高下順逆之勢推求循環往復之宜其有合者當機決之其不合者面壁而冥默繞室而旁皇甚至登高遠眺臨流兀立渺乎若思茫乎若迷及其有得也則有豁然貫通狂喜累日者以一身攬其大綱得兩弟分理其節目可謂同條共貫者矣有時雜工人工作塗體沾足不顧也有時同工人食息豆粥草薦自若也如是者六閱月由渠口用生工開至烏蘭淖地方此四十里地皆高阜不能上水計糜欸數萬元耗糧千餘石工未及半而力已無餘欲罷不能欲進無力此正所謂成敗得失關頭也爰乃熟慮兼權妥商救濟之策由春林鶴林商洽教士以烏蘭淖下之教堂地上水爲度按厘股分利於是水利日宏收益日多大工得以繼續進行終底於成此卽春林鶴林所謂同心克濟有志竟成者也計該渠全身長一百四十里寬十丈深一丈共歷時七年之久用欸四十萬元之鉅每年

能灌地兩千餘頃廼思民國六年以前該渠左右百餘里僅一片荒磧耳自有此渠而黍油麥秀彌望青苗廬舍雲屯村鎮霧列田歌百里烟火萬家蒸蒸我民得以鼓腹遊擊壤歌者伊誰之賜哉撫撫大地得以啟爾宇固爾封者又誰之力哉向非茂林區董倡於前春林鶴林區長繼於後何以致此十四年臨河設治劃該地爲四區任春林爲區長爲地擇人從民意也十五年二月茂林猝患中風不起手造地方功在民社積勞成疾正命以終歿之日野祭巷哭道路隕涕未邀生榮可謂死哀已春林區長幼秉特質有血性持家應世悉本至誠當民國四五年地方多故是時適長五原西區出其全力以支應多方任怨任勞現狀得以維持迨充臨河四區區長值國民軍全部駐套徵發無虛日春林區長多方供億振廩傾倉無吝色全區民戶得以各執其業各安其生遇事必取公開寸銖之輸將顆粒之征索攤派一本大公故全區翕孚無爭議無後言十八年春歲大饑東路饑民就食本區者萬餘糧根奇荒斗米萬錢承辦賑務慨捐糧數百石又勸募各大戶照章支放事必躬親惠期均沾全活無算鶴林於十八年接充區長時值回軍攻寧敗竄駐距楊家河數十里之大灘飢軍萬

餘時時出入四區焚劫淫掠勢岌岌不可終日鶴林商承官府駐軍或則減價平糶以示卹鄰之仁或則正式制止以申保民之義如持危柁於驚風駭浪中操縱在手晏然不驚穩渡重洋同舟客子談笑食息竟若行所無事者厥功亦云偉矣夫楊家河子一渠關係全區之命脈如此茂林畢生之精力與事業盡注於該渠是誠不愧爲實業家而兼大建築家矣尤可幸者春林鶴林區長聯袂接踵繼起而敬承其業又善師其養渠之法以培養花戶爲先務春耕則貸以食糧借以籽種秋收則薄其租入寬其逋負俾令家有餘粟戶有餘財人有餘力有無相通緩急足恃相需以長相資以生從茲大渠水利恢之彌長引之彌廣是又在因時制宜善通其意者矣近日言實業者多矣伊孰能不畏難不避險堅苦卓絕爲地方開闢絕大水利又誰能善守勿失爲地方永保此絕大水利若楊氏兄若弟者可以風矣

臨河商會劉會長珍事略

旨哉貨殖傳之言曰其善者因之其次利導之其次教誨之其次整齊之臨河商業始兆胚胎無所謂因也利導之以開不匱之源教誨之以立撙節之制而已然而利導教誨之方非有進退商業之權而又熟悉商界情變因地制宜因利乘便者不能措置裕如焉吾於商會劉會長得之劉會長名珍字明卿河曲人幼聰穎勤學問讀書能得大意年少長一日廢書歎曰讀書破萬卷不能立產致千金與其螢窗坐枯何如及早從范少伯遊以謀生計耶於是棄儒而賈西遊河套究心物產登耗之數殫志百貨流通之原億無不中計無不盈商界中爭傾倒之十八年商會改選公推爲會長任事以來根據原定商法參合當地商情於商路則疏通之於商情則聯合之於商貨則消息酌劑之而且評定物價以示其信疏通金融以暢其流其有利商業者保持之不便商業者革除之臨河商業散漫重以比年多故原狀幾難恢復得劉會長倡導而崇起之商界始有一線曙光遂蒸蒸焉有生機焉吾爲之進一解曰長袖善舞多財善賈儻能多募股資經營一絕大規模之行棧高視遠躡聚四方之貨

日
示
三
積而常流通百族之財贏而不匱所謂利導而教誨之又進而整齊之矣豈不盛哉

臨河商會于副會長相龍事略

河北甯津于先生清泉商界中巨子也天性溫厚材力聰彊多機警工計然術早歲從河北大賈遊往來西盟內外蒙地嫻熟蒙人文字語言習俗善揣時尙好爲投機事業奔走氈廬毳幕間與蒙人杯酒通欵曲如家人昆弟歡故懋遷所得常倍於他商民國初元來套治農業講求種植樹藝法物土之宜盡地之利歲致豐盈家日起兼業酤麴香泉洌爲河套之冠十五年地方差務煩重紳董皆引避出佐王丕卿先生主持農商會支配軍需應付各方不窮於用危局得支拄十八年商會改選公推爲副會長臨河漢蒙交易向居一大部分先生熟習蒙情消息盈虛因勢而導之稱物而施之操奇計贏攸往咸宜不止此也內外蒙向背之機離合之局倏忽百變外人莫得真相得欵洽蒙旂如先生者何異傳音於空谷燃鐙於暗室也豈惟地方賴之政府亦利賴之已

...

...

...

...

...

...

...

...

...

...

...

臨河抵產局魏經理三槐事略

繫占軫重民生春有省而補之秋有省而助之周禮旅師以質劑致民平頒其興積荒政十有二首曰散利此非徒煦沫爲仁噢咻爲惠張皇補苴於吾民也取民之所有以爲質益民之所無以爲劑所謂因民之利而利之如我綏遠流通券抵產之法真能得古法不泥古法者矣雖然宜民者法也行法者人也是以人行法法足利民有法無人法轉厲民求一實心實政而實惠及民者其惟魏經理三槐爲近之已經理系出府谷名族書香繼世代有傳人太翁紹業有聲庠序碩望耆德爲一鄉祭酒經理生負雋才夔校翹舒有遠志民國初元來套治實業與李區長增榮訂杵臼交歷充地方機關要職幹理措置罔不井井以是官若紳競推重之十四年臨河設治經理協助地方凡百建設贊畫不留餘力十六年省府頒發流通券定抵產法臨河設抵產局公推魏君三槐爲經理任事以來通籌兼顧循名綜實有產可抵者則分配而頒發之無產可抵而確有保證者亦結約而調劑之人無缺望無後言全境貧民得以費牛力購籽種東作興事西成告豐者胥賴乎是已地方近年迭遭浩劫財政紊

亂重沓影射莫可究詰自十六年設立公款局十八年改設財務局經理出其縝密精覈之
 思坐理夫糾結錯綜之緒必令入之也有制而不煩不苛出之也有節而母冗母濫不紊其
 端自不匱於用何莫非經理相助為理有條不紊耶噫士君子懷才不遇不得竟其所施而
 効職於一鄉一里但使能拯災捍患給求養欲民力得紓民生得遂盡其力所能為已可對
 地方而無憾矣古所謂小用之則小效其在斯歟其在斯歟

(Faint bleed-through text from the reverse side of the page, including characters like 夫, 思, 端, 効, 職, 於, 一, 鄉, 一, 里, 但, 使, 能, 拯, 災, 捍, 患, 給, 求, 養, 欲, 民, 力, 得, 紓, 民, 生, 得, 遂, 盡, 其, 力, 所, 能, 為, 已, 可, 對, 地, 方, 而, 無, 憾, 矣, 古, 所, 謂, 小, 用, 之, 則, 小, 效, 其, 在, 斯, 歟, 其, 在, 斯, 歟)

